




Early European Books. Copyright © 2012 ProQuest LLC.
Images reproduced by courtesy of the Biblioteca Nazionale Centrale di Firenze.
CFMAGL 2.6.385/a





Early European Books, Copyright © 2012 ProQuest LLC.
Images reproduced by courtesy of the Biblioteca Nazionale Centrale di Firenze.
CFMAGL 2.6.385/a



Early European Books, Copyright © 2012 ProQuest LLC.
Images reproduced by courtesy of the Biblioteca Nazionale Centrale di Firenze.
CFMAGL 2.6.385/a





Early European Books. Copyright © 2012 ProQuest LLC.
Images reproduced by courtesy of the Biblioteca Nazionale Centrale di Firenze.
CFMAGL 2.6.385/a


2. 6. 385

2 N. 6

XXXIV
SCHMID







DISPUTATIO THEOLOGICA
SOLENNIS
DE

Partibus salutarem poenitentiam constitu-
entibus, & in specie, de priore ejus parte

CONTRITIONE

Ex Psalmo. 51. v. 5.

Iniquitatem meam ego cognosco, & pecca-
tum meum contra me est semper.

QUAE
DEI AUSPICIIS
PRÆSIDE

JOHANNE SCHMIDIO,
SS.TH.DOCTORE PROFESSORE SENIORE,
THEOLOG. FACULTATIS h. t. DECANO,
Rev. Conv. Eccles. Præsides, Cap. Thoman. Præposi-
to, & Summi Templi Ecclesiaste,

Dn. Patrono, Præceptore, Promotore, pia
observantia obsequiosè venerando

â me

RESPONDENTE

Friderico Samuele Geroldto.
Argentinense.

Habebitur die 26. Februarij.

ARGENTORATI.

Ex Musæo Chalcographico JACOBI THILONIS,

ANNO clō. lōc. LVII.



VIRO
SPECTATISSIMO AM-
PLISSIMO QVE
DOMINO
FRANCISCO CHRISTO-
PHORO CAROLI,
INCLYTI ORDINIS
DOMINORUM
QUINDECIMVIORUM
SECRETARIO
Longo varioque rerum usu
EXCULTISSIMO,
PATRONO
â multis jam annis
MAGNO.

Se suaque studia
devota humilitate
commendat
hac Solenni Disputatione
Fridericus Samuel Geroldt.
Argent.



Σὺν Θ. Ὁ.

DISPUTATIO SOLENNIS

De partibus salutarem poenitentiam consti-
tuentibus, & in specie

De

Contritione,

quæ prior poenitentiae pars est,
Ad locum

Psalmi 51. v. 5.

Iniquitatem meam ego cognosco, &
peccatum meum contra me est semper.

§. I.

Apid *dei cordis ablationem* inter maxima *Προσέλαση*
beneficia sua Jehova numerat Ezech. 11. 19. ex Ezech.
ubi, cum populo Judaico, & imprimis ejus *11, 19.*
Principibus & Optimatibus, (qui post ab-
ductionem Regis Jechoniae Hierosolymæ
manserant, & dudum Prophetæ Jeremiæ
conciones & oracula de instante excidio securè contemserant,
neq; jam Ezechielis verbis, ex ore divino haustis, habebant fi-
dem, nunquam fore secum persuasi, ut vel Hierosolyma in ho-
stium Chaldaeorum potestatem veniat, vel ipsi inde ejiciantur;
urbem enim esse *lebetem* Deo consecratum, se verò *carnes* in eo, *Ubi cor-*
v. 3. ideoque futurum, ut Deus & urbem & incolas, contra po- *dis lapidei*
tentissimorum hostium vim & impetus, sit conservaturus) gra- *ablatio-*
A *visissimas* *nem Deus*
pollicetur.

vissimas denunciasset pœnas, quod, quia plurimos in urbe occidissent, ejusq; vias & plateas cadaveribus intersectorum implevissent, adeoque verè urbem fecissent quendam quasi leberem, carnibus, sed innocentum, quos aut impiis judiciis, aut vi iniqua peremissent, plenum, v. 6. & 7. ipsos educturus sit de medio urbis, permitturus, ut patria, domiciliis, possessionibus suis ab hostibus expellantur, quod gladium, quem metuant, super eos inducturus v. 8. daturus eos in manus hostium, & judicia in ipsis factururus v. 9. &c. cum etiam Pheltiam filium Banaia dubio procul principem derisorum, qui minas Prophetarum nihili æstimandas, neque ipsorum admittenda consilia æstimarent, repentina morte, non sine horrore adstantium, abripuisset, & ad formidabile hoc spectaculum ipse quoque Propheta exterritus esset, metuens, ne Iehova reliquiarum Israël consummationem faceret v. 13. quin & inter Judæos jam incaptivitate Babylonica exulantes haut pauci invenirentur, qui de promissa in patriam terram reductione dubitarent, subito ad jucundissimas progreditur consolationes, quibus omnibus iis, qui sponte cum Jechonia in exilium abierant, pollicetur, fore, ut Iehova suo tempore eos non tantum sit congregaturus de populis, in quibus nunc exulent, & adunaturus sive collecturus de terris, in quibus jam sint dispersi, & redditurus ipsis humum Israël v. 17. sed etiam Spiritus sui sancti gratia eos illuminaturus, ut abominandam idololatriam, cui pridem cum aliis dediti fuerant, & agnoscant, & detestentur, & omnino aboleant; adeoque novum spiritum, cor carneum daturus in visceribus eorum, cor verò lapideum de carne ipsorum ablaturus, v. 19.

2. Cordis vocabulo in scriptura sacra omnes animæ rationalis facultates, vires & operationes, scilicet intellectum, voluntatem, judicium, cogitationem, consultationem, electionem, affectus, conatus complecti, alibi, ex diversis Veteris & Novi Testamenti locis, ostensum est. Hoc pro varia conditione & statu varias sustinet appellationes. DEO enim gratiosè operanti se si submittat, fidele, integrum, purum, rectum, verum, mundum, novum, carneum dicitur. Contrà si eidem docenti, monenti, hortanti, minanti reluctetur, contumax, elatum, fraudulentum, malignum, perversum, scortans, durum, denique lapideum vocatur, ubi (quæ Theodoretus verba sunt) nemo eorum, qui natura prudentes sunt, opinatur.

Cor humanum pro vario statu varia sortitur nomina.

opinabitur lapideum cor lapidis esse, sed obedire renuens atq; in exorabile, quodq; DEO nolit credere &c. Bernhard. lib. 1. de considerat. ad Eugenium Pontificem pag. 254. locum Ezechielis de corde lapideo adducens; ex semetiplo quærit: *Quid est cor durum* (& lapideum?) subicit: *Ipsum est, quod nec compunctione scinditur, nec pietate molitur, nec movetur precibus, minus non cedit, flagellis duratur, ingratum ad beneficia est, ad consilia infidam, ad iudicia seivum, invecundum ad turpia, impavidum ad pericula, inhumanum ad humana, temerarium ad divina, præteritorum obliviscens, præsentium negligens, futura non providens: ipsum est, cui præteritorum, præter solas injurias, nihil omnino non præterit, præsentium nihil non perit, futurorum nulla, nisi fortè ad ulciscendum prospectio seu preparatio est. Et ut brevi cuncta horribilis mali mala complectar, ipsum est, quod nec Deum timet, nec hominem revereatur.* Optima pessimæ rei descriptio: Tametsi enim præcipue propter indocilitatem cor perversum dici videatur lapideum, quod quemadmodum silices in alienam aliquam speciem informari non possunt, sic indurata mentes non flectantur ab eo, quod semel arripuerunt, & ad formas alias seu disciplinas se præbeant indociles. Vide Sanct. in Ezech. cap. 11. p. 231. evidens tamen est tum ex hisce Prophetæ, tum aliis scripturarum locis, ubi lapidei cordis fit mentio, omnia modò à Bernhardo enumerata atque alia vitia æquè eodem contineri. Sicuti enim cor carnem à Spiritu sancto ingeneratum, quoddam quasi domicilium est omnium virtutum, quas regeneratio & renovatio complectitur: sic cor lapideum omnium vitiorum fœda quædam atque abominanda in non renatis colluvies est. Polanus in Ezech. pag. 295. redditurus rationem, cur Deus cor hominis lapideum & non ferreum appellet, inquit: quoniam etiam si ferrum durum sit, ut manibus flecti non possit versariq; sicut cera, tamen habet quandam qualitatem, licet exiguam ad molliem, nempe ut, si igni admoveatur, molle fieri queat, & malleo in omnem formam flecti, quanquam remaneat ferrum, nec mutet naturam: at lapis nullam habet molliem, neq; ad molliem aptitudinem, ut scilicet igne adjutus mollescere, adeoq; versari & flecti possit, permanens lapis. Sed egreditur comparationis limites & cordi humano etiam passivam potentiam naturalem, per quam Spiritus sancti conversionem operantis gratiam recipere idoneum est, adimit. Lapis omni potentia passiva recipien-

Et sic etiã
propter ex-
tremam
contuma-
ciam lapi-
pideum
dicitur.

ciptendi mollitiem natura destituitur : at non ita cor humanum, cujus mens lumen notitiæ DEI recipere, voluntas ad obedientiam legi divinæ debitam flecti, affectus, ut decentem moderationem teneant, regi possunt, quæ de re disp. de libero arbitrio actum. Aliàs æquipollentia sunt in sacris literis lapideum, ferreum, æreum, quando de humani cordis malitia sermo est Esa: 48, 4. scio, inquit, quia durus es tu, & nervus ferreus cervix tua & frons tua ærea, ubi ferrea cervice & ærea fronte idem quod lapideo corde significari, per se manifestum est.

Quæ lapidea contumacia est originalis.

3. Est autem cor hominis lapideum partim origine, & ex ipso in utero matris contracto vitio profundissimè infixio. Mollis & carneus erat per primam creationem homo ad imaginem DEI formatus, pronus & promptus ad legem sibi à Creatore suo, sive primùm inditam, sive postea præscriptam, plenè & per omnes partes observandam, quippe nulla interiori concupiscentia in contrarium alleccebatur aut rapiebatur. Verùm quo momento libero suo arbitrio abusus, mendacissimis Satanæ blandimentis locum dedit, & divinum mandatum violavit, periit sanctissima mollities, abominanda durities successit: quod carneum pridem cor fuerat, factum est lapideum, perversum, rebelle, contumax, hostili odio adversus DEum ejusque legem fremens. Atque id in omnes primi hominis naturales posteros sine exceptione, sine graduum variatione, propagatum à mundi origine fuit, hodieque propagatur. Omnes enim, ut Augustana Confessio articulo secundo habet, nascuntur cum peccato, hoc est, sine metu Dei, sine fiducia erga Deum & cum concupiscentia &c: carent justitia originali, illa naturæ perfectæ cum divina lege conformitate & concreata omnium animæ virium rectitudine: corrupti contra sunt prava concupiscentia & vitiosa qualitate, per quam DEum ipsum ejusque voluntatem averfantur, ac ad perpetranda ea, quæ lex divina prohibet, trahuntur. Deinde cor hominis magis lapidescit, ut sic dicamus, ex actuali malitia cum originali duritiei non tantùm non resistitur, sed & ea peccatis contra conscientiam & elata manu, ut scriptura loquitur, commissis augetur. Ferrum naturâ durum crebro & frequenti ictu fit durius: sic cor humanum naturâ lapideum, consuetudine peccandi, paulò post fit saxeum, ac tandem siliceum. Exemplo est Pharaon, qui, quò sapius divina monita,

Et actualis

monita, minas, prodigia contemnit, hoc magis fuit induratus Exod. 7, 13. & 22. cap. 8. 19. 9. 35. ubi juxta vulgatum, *cor ejus nimis induratum* fuisse legitur. Exemplo etiam & maxime quidem sunt Judæi, quos cum Jehova non longè post educationem ex Ægypto *populum dura cervicis vocavit*. Exod. 32, 9. ut hac increpatione ad obediendi studium excitaret, cum postea sapius monuerit, *ne cervicem suam amplius indurent*. Deut. 10, 16. tantum tamen absuit, ut molliores, inde facti sint, ut ipsa quodammodo monita ad majorem duritiem & perveraciam adhibuerint: quæ de re graves passim, in historia sacra & prophetarum oraculis, quærelæ extant. Confer imprimis 2. Reg. 17, 13. & seqq. Neh. 9, 16. & 29. Jer. 5, 3. ubi supra *petram facies suas eos indurasse* Jehova per Prophetam ait: adde cap. 7, 26. cap. 17, 23. cap. 19, 15. ut & emphatica verba Zach. 7, 11. & 12. *aggravaverunt aures suas, ne audirent, & cor suum posuerunt ut adamantem*: facti tandem sunt tam indurati, ut quemadmodum *Æthiops pellem suam, aut Pardus varietates suas mutare nequit*, sic nec illi potuerint benefacere, cum malum didicerint. Jer. 13, 23. De quo loco tamen notandum, non absolutam impossibilitatem, sed summam difficultatem eodem describi. Æthiops & Pardus non sunt naturalia subjecta recipiendi alios colores ab iis, quos per naturam habent: at hominis mens & voluntas, sive cor humanum, est manetque naturale subjectum, patiens & recipiens divinam operationem, adeoque spiritualiter carnem molliem: quod pertinent, quæ sub finem præced. §. dicta.

4. *Hoc lapideo corde cum nihil sit miserius* (siquidem per ejus duritiem homo omnia beneficia spiritualia, adeoque ipsam animæ salutem à Spiritu sancto in verbo oblatam, quasi vi quadam à se repellit, & semetipsum indignum æternæ vitæ judicat. Act. 13, 46.) danda omnibus, qui tale secum in carne circumferunt, opera, ut inde maturè divina gratia eximatur & auferatur. *Divina dicimus gratia*. Non enim homo propriis viribus cor suum, si lapideum factum sit, in carneum transformare potest. Hoc quidem facile protoplastis fuit cū carneis à Cōditore Deo cordibus creati essent, ea in lapidea convertere, antiqui serpentis mendaciis ac seductionibus aures præbere, violare divinum mandatum, & hoc pacto exuta DEI imagine & originali justitia, menti caliginem & tenebras inferre, voluntatem & reli-

Conjuncta:
cum incre-
dibili mi-
seria,

Quam ex
semetipso
auferre ne-
mo homi-
num suis
viribus po-
test,

reliquas animæ vires non tantum à divina legis amore & custodia alienas reddere, sed & hostile adversus DEUM odium in ijs accendere, perversitate & contumacia indurare; at, cum jam corda lapidea facta essent, eadem eximere, abjicere & pristina carnea revocare atque assumere, in ipsorum arbitrio & potestate nequaquam fuit, neque hodie in posterorum viribus situm est. Eodem modo facile Pharaoni & Judæis olim fuit, corda sua, jam antè ex originali perversitate lapidea, actuali malitia amplius indurare: sed duritiem jam contritam animis deponere, & cor ad obedientiam promptitudinem emollire, extra naturæ fuit potestatem: quæ etiam hodie omnium eorum, qui, ad Pharaonis & Judæorum exemplum, conatam cordium perversitatem quotidianis peccatis augent & cumulant, est ratio. Divina itaque gratia & solius quidem opus est, manetque *cor lapideum ex carne auferre*, dare carneum, durum emollire mentem, ferreum cervicis nervum flectere; ad quod exequendum DEUS, præter alia, præviam CONTRITIONEM; priorem pœnitentiæ partem, adhibet, qua per legem suam, veluti malleum quendam petras confringentem, ut securæ atque obduratæ hominum pectora, peccatorum suorum iræ divinæ, & promeritarum pœnarum agnitione, paulatim mollescant, aliquo modo efficit. Divina gratia opus hoc contritionis sano sensu vocamus. Tamen si enim non Evangelio, quod gratiæ nuncium est, sed lege, quæ iram operatur, mediante peragatur: quia tamen, ex intentione Dei, finem non habet, ut homo peccator ad desperationem inde adducatur & interitum, sed ut in eo desiderium gratiæ, auxilii, solatii, remissionis peccatorum, iræ pœnarumque aversionis excitetur, hinc à divina gratia proficisci rectè dicitur. Urere, secare, vomica aperire, aliaque id genus, quæ dolorem pariunt, perficere, ut agro recuperandæ sanitatis via quodammodo paretur, fidelis medici est: ita lapidea & dura percutere & conterere corda, ut gratiæ divinæ capacia fiant, DEI benigni est ac clementis.

Solus enim
DEI hoc
opus est.

Applicatio

§. Hoc divinum *pœnitentiæ Contritionis* opus animus jam est, nonnullis de genuina pœnitentiæ partitione præmissis, sacro μελετήματι, ex Prophetarum & Apostolorum monumentis, breviter repetere, & piorum de eo colloquiorum instituentium

endorum præbere occasionem, ut sana doctrina partim ampli-
us illustretur & stabilietur, partim à variis corruptelis & hete-
rodoxis opinionibus vindicetur. Quia enim superioribus
mensibus articulum de Pœnitentia in genere, ordinaria dispu-
tatione, proposuimus, & de ejus nomine, causis, objecto, sub-
jecto, adjunctis &c: egimus, ipse nos ordo & materiæ ratio
obstringit, ut nunc ad specialem singularum pœnitentiæ par-
tium, quarum prior Contritio est, meditationem progredia-
mur.

6. Placet autem è variis utriusque Testamenti locis, quæ Textus
huic de pœnitentia contritione sedem præbent, Psalmi scilicet. vers.
5. in frontispicio adscripti (ut consuetudini nostræ inhærea-
mus) διαδοχῇ methodicæ tractationi præmittere, qui in he-
bræo ita habet: **וְשָׁעִי אֲנִי אֹדֶעַ וְחַטָּאתִי נֹגְדִי הַמּוֹדֵד** juxta
Chaldæum: **אֲרָא מַרְדְּבִי גִלְיָר וְחַיִּי לְפָנַי הַיּוֹרֵא**
quoniam scelera mea manifesta sunt, & peccatum in conspe-
ctu meo semper. Juxta septuaginta: *Τὴν ἀνομίαν μου ἐγὼ γινώσκω,*
καὶ ἡ ἁμαρτία μου ἐνώπιόν μου διαπαντός. Juxta vulgatum: *Iniquitatem*
meam ego cognosco, & peccatum meum contra me est semper. A-
pud Tremellium & Junium: *Defectiones meas ego agnosco, &*
peccatum meum obversatur mihi jugiter. Apud Lutherum Ger-
man. *Ich erkenne meine Missethat vnd meine Sünde ist immer*
für mir. Apud Piscatorem: *Ich erkenne meine Vbertretungen/*
vnd meine Sünde ist stets für mir. Apud Dietenberg. *Ich er-*
kenne meine Vbertretung vnd meine Sünde ist immer wieder
mich.

7. Psalmum quinquagesimum primum, qui inter pœni-
tentialis quartus quidem est, sed, si dignitatem & doctrina-
rum, quas continet, ubertatem spectemus, facilè primus &
præcipuus, variis hinc à Veteribus elogiis insignitus. Chryso-
stomus in expositione *ἐπερχειν* hujus Psalmi fol. 692. tom. 1.
edit. Savil. eum *imaginem* vocat: *τὸν γὰρ ψαλμὸν εἰκόνα καλῶ,* in-
quit, & mox, rationem appellationis reddens, subjicit: *βλέπω γὰρ*
διάφορα πρόσωπα ἐν τῷ ψαλμῷ, ἁμαρτίαν ἐπιτεσαν καὶ σφατιομένην, μετα-
νοίαν παρέρωσαν καὶ συμμαχῶσαν θεῷ, φιλανθρωπίαν ἀνωθεν λάμπουσαν,
φιλοσοφίαν παρέχουσαν καὶ πολλὰς ἔχουσαν σακρῶν πηγὰς ἐξομολογήσεως.
Ταῦτα τὰ πρόσωπα τῆς εἰκόνος. Hortatur etiam ibidem, ut, mis-
Psalmus
quinka-
gesimus
primus in-
ter pœni-
tiales præ-
cipuus,

sis aliis imaginibus, ē quibus vel nihil, vel parū commodi in
 nos redundat, hanc maximē imaginem assiduē cōtemplemur:
 ἄφες, αἰτ, ἐκείνας τὰς εἰκόνας, καὶ βλέπε τὴν τὴν θεωρίαν. De seipso
 scribit: Τί μοι ὁ φεῖ βασιλέως καὶ ὑπάρτε εἰκόνα ἰδεῖν; ἐὰν ἴδω ἁ-
 μαρτωλὸν καταπεσόντα καὶ πάλιν ἀναστάντα, ἡ θεωρία διδασκαλίας
 ὑπόδειξις μοι γίνεται. Ἐὰν ἴδω δίκαιον ἔσῳτα, ἡ θεωρία πρὸς φιλοσο-
 φίαν χειραγωγεῖ με. Ἀπὸ τῆς θεωρίας μανθάνω τὴν μάχην, καὶ παιδεύ-
 ομαι τὴν νίκην. Ἐὰν ἴδω δίκαιον ὑποσκελισζόμενον, πάλιν σοφώτερος
 ὑπὸ τῆς θεωρίας γίνομαι &c. Cyrillus Hierosolymitanus catech. 2.
 qua de peccato, pœnitentia & remissione peccatorum agit, eo-
 dem ferē modo loquitur. Ad Davidem enim ejusque pœni-
 tentiam ubi provehitur, inquit: Ἐλθε ἐπὶ τὸν Δαβὶδ τὸν μακά-
 ριον, καὶ τύπον λάβε τῆς μετανοίας. Alii eundem præclarum ap-
 pellant pœnitentia theatrum omnibus ad Deum converti atq; ἁ pec-
 catis, sive humana fragilitate, sive malitia commissis, resipiscere vo-
 lentibus, propositum & constitutum. Alii resipiscencia scholam
 omnibus apertam, in qua discatur, quæ sit omnis mali scaturigo
 scilicet primorum parentum peccatum ad nos per carnalem nativi-
 tatem propagatum & in prima conceptione nostra nobis infusum.
 deinde qui hujus mali horribiles effectus, scilicet omnia peccata actu-
 alia contra utramq; tabulam Decalogi commissa, porro quod reme-
 dium tantæ miseriæ, nimirum DEI misericordia: quæ via & ratio
 hujus consequenda, scilicet seria pœnitentia, quæ pœnitentia conse-
 quentia, qui fructus &c. Sunt, qui cum templo Salomonis hunc
 psalmum conferunt, in eoque ostendunt altare, candelabrum
 aureum, variis lucernis instructum, arcam, labrum aneum, sacrifici-
 a &c. Sunt, qui maximo alicui campo, in quo acerrimum com-
 mittitur prælium, itemq; tabula artificiosissime picta, in qua varia
 variarum personarum negotia representantur, similem faciunt.
 Beatus noster Lutherus in præfat. enarrat: hujus psalmi tom. 4.
 lat. Jen. fol. 371. 6. Hic psalmus, ait, inter omnes pœnitentia psal-
 mos est celeberrimus, cujus, cognitio multis modis est necessaria &
 utilis; continet enim doctrinam de præcipuis nostræ religionis capituli-
 bus &c. Brentius hæc omnia secum expendens pag. 606. cum
 nostri, inquit, officij sit, omnes Psalmos in numerato habere, hic
 Psalmus debet nobis præ multis aliis esse familiarior, adeoq; nostris i-
 psorum nominibus notior &c.

Qui quidē
 varios fidei
 articulos
 continet.

8. Omnia rectissimē. Si enim & psalmi ἐπιγραφὴν & psal-
 mum

mum ipsum, & singulos ejus versiculos, & singulorum versicu-
 lorum verba piè religioſeque meditemur, ubique vel manife-
 ſta ac perſpicua variorum fidei articulorum fundamenta, vel
 veſtigia non omnino obſcura deprehendimus. *Ministerium*
Eccleſiaſticum ejusque efficacia confirmatur in titulo, quan-
 do David non per viſionem aliquam aut occulto mo-
 do, ſed per concionem Prophetæ Nathanis vocatur & excita-
 tur ad pœnitentiam. De DEO ejusq; ſpeciali attributo miſericor-
 dia, ut & de vera ſolius DEI invocatione v. 3. de lege v. 5. de pecca-
 to actuali v. 6. de originali v. 7. De Evangelio, quo continetur
 veritas & occulta DEI ſapientia, cujus ſumma eſt, ut Lutherus
 inquit p. 390. b. quod DEUS peccatores, agnoſcentes ſuam miſeriam
 & conſidentes miſericordia, non velit abjicere pro merito, ſed ex gra-
 tia ſalvare v. 8. De peccatorum expiatione, Chriſti ſanguine facta,
 adeoque de vera juſtificatione hominis peccatoris coram DEO, ſub
 typo hyſſopi v. 9. De pace & gaudio conſcientia ex concione Evan-
 gelii natis v. 10. De renovatione & ſanctificatione v. 12. De fidei
 & Spiritus ſancti per atrociam peccata amiſſione v. 13. De bonorum
 operum ſtudio v. 15. 16. 17. De ſacrificiis ſpiritualibus DEO placentibus
 v. 18. 19. 21. De Eccleſia ejusq; conſervatione & propagatione v.
 20. Eminent tamen doctrina ſive articulus de pœnitentia, cujus ſin-
 gule partes hoc pſalmo, ceu in illuſtri pictura ſpectanda proponun-
 tur, quæ Lutheri verba ſunt. pag. 372. a.

9. Prior Contritio, tametſi aliquot verſiculis deſcribatur &
 per totum ferè pſalmum ſparſa legatur: quinto tamen, qui no-
 ſtræ jam meditationis eſt, præcipuè ob oculos ponitur, in quo
 ordine conſideranda 1. David. 2. Davidis peccatum. 3. Peccati
 agnitio. 4. Agnitiois perpetuitas ſive perſeuerans continua-
 tio.

10. Davidis, (juxta latinos dilecti) divina inſpiratione, men-
 tionem primùm facit Prophetæ Samuel. lib. 1. cap. 13. 14. non
 quidem vel familia, vel nominis expreſſione, quæ nondum i-
 pſi revelata erant, ſed ſingulari raroque elogio, quando eum
 vocat Virum, queſitum à Iehova, ſecundum cor ipſius. Davidem
 enim eodem notari, nemo eſt, qui dubitat. Saulem ex tribu
 Benjamin pridem ſuo modo quæſiverat Iehova & invenerat ad
 cor ſuum, ſed tantùm aliquandiu, non conſtanter. Quia enim

Inprimis
 tamen ex-
 actè tradit
 doctrinam
 de pœni-
 tentia.
 Cujus pri-
 or pars eſt
 Contritio
 comprehen-
 ſa verſu
 quinto, in
 quo ſpe-
 ctanda.

1.
 David,

B

ſecun-

Vir secundum cor
DEI.

Aliquan-
do quidē
lapsus.

secundum cor Iehova is est, qui ab ipso immediatē vocatus, iuxta voluntatem ejus res suas instituit, gerit morem, pietatem sectatur, varia virtutum edit specimina, certē quamdiu Saul talis fuit. Deum vocantem coluit, bella ad nutum ejus & ex occulto instinctu gessit, Samueli Propheta obtemperavit, speciatim insigni animi demissione præditus fuit, nec verbis tantum sed etiam factis ipsis eam ostendit, regis honoribus se indignum aestimavit, eosque fugit, adeoque parvulus in oculis suis fuit, ipso Samuele teste, lib. 1. cap. 15. 17. prudentia, clementia fulsit. 1. Sam. 10, 27. 11, 13. quis neget, eum fuisse virum ad cor DEI? David autem finaliter hoc elogio se dignum exhibuit, & omnes DEI voluntates fecit Act. 13, 22. Quæ quidem verba, sunt, qui non de voluntate simpliciter omni accipiunt, non de voluntate, quæ fide, agnitione DEI ejusq; amore & cultu piis omnibus communi expleta est, sed tantum de ea, quæ ad regni bellorumq; administrationem pertinet: Verum non admittit hanc restrictionem, si ipsa phrasis, si Davidicæ vitæ curriculum, si inter ipsum & Saulem instituta oppositio. Esse ad cor DEI non tantum est administrantibus donis in publico officio ritè uti, sed etiam vitam omnem ac mores ad nutum divinum componere, atque inde DEO singulariter gratum esse & acceptum. Autor homiliæ de David & Goliath. apud Chrysost. tom. 1. pag. 635. statim sub initium, ad verba Jehovæ, inveni mihi virum secundum cor meum, ô beatum, inquit, David, qui, quicquid DEus cogitat, gerit, quicquid mente concipit, perficit: cordi DEI cor proprium jungit, & menti ejus mentem suam annectit, ita ut, quæ vult DEus velit, & quæ non vult, similiter nolit atq; sic eum Dominus individuo amore & conjuncta charitate dilexit. Hoc est ad cor DEI esse, quo instatu, ut omnem vitam perageret David à pueritia ad finem usque vitæ maximopere contendit. Sanè factum semel iterumq; ut in laudatissimo cursu non tantum inpingeret, sed etiam graviter laberetur: quo tempore ipsum secundum cor DEI fuisse nemo dixerit: at quia non multo post rediit in viam, & quod contra cor DEI commiserat, secundum cor DEI maturè correxit: agnovit peccata, de iis doluit, voluntati divinæ ad quamvis castigationem, adeoque ad regni ablationem ac perpetuum exilium se subjecit, extremas injurias,

rias, convitia patienter tulit, & quod reliquum vitæ fuit, piæ, sanctè, religiosè transegit, hinc cum virum secundum cor DEI fuisse & mansisse, rectè dicitur: maculam vitæ ejus curriculum habuit, sed quæ per seriam & maturam pœnitentiam est exterfa: quemadmodum & Jobus suos in gravissimis calamitatibus habuit naves, eosque non leves, nec tamen patientis nomen laudemque amisit, sed in Novo Testamento Jac. 5, 11. & inde in hunc usque diem retinuit. Atque eò spectat, quod Spiritus sanctus cum 1. Reg. 15, 4. & 5. in commemoratione pietatis & laudum Davidis mentionem quidem peccati ejus facit, nihilominus testimonium ei perhibet, quod fecerit, quic, quid rectum in oculis Domini, & non declinavit ab omnibus, quæ præceperit Dominus, cunctis diebus vitæ suæ, nimirum non ad unum vel alterum *delictum*, sed ad perpetuæ vitæ tenorem respicit. Augustinus libro de octo quæstionibus Dulcitii quæst. 5. tom. 4. pag. 673. Cum præficeret, ait, DEus, Davidem peccaturum, & peccata sua pia humilitate & sincera pœnitentia deleaturum, cur non diceret: inveni David secundum cor meum: cui non erat imputaturus peccatum, tam multa bona facienti & cum tanta pietate viventi, & ipsa pietate pro peccatis suis sacrificium contriti Spiritus offerenti? Propter hæc omnia verissimè dictum est: inveni David secundum cor meum, quia licet secundum cor DEI non esset, quod ille peccavit, tamen secundum cor DEI fuit, quod pro peccatis suis congrua pœnitentia satisfecit. Hoc solū ergo in illo secundum cor Dei non fuit quod illi Deus non imputavit: hoc itaq; ablato, id est, non imputato, quid remansit, nisi unde verissimè diceretur: inveni David secundum cor meum. Denique quemadmodum Saul, cui opponitur David, non tantum in regio munere, sed ex quo à DEo defecit, omnibus ferè actionibus contra cor DEI fuit, ambitione imprimis & invidia flagrans, inde factus crudelissimus, perfidus, ut & superbus, avarus, insignis hypocrita &c. confer ejus historiam 1. Sam. 14. & seqq. sic quoque David non tantum propter prudentem religiosamque regni gubernationem, sed etiam propter alia vitæ officia & actiones, quas ad legis divinæ normam instituit, secundum cor DEI fuisse estimandus est.

II. Non est loci aut instituti hujus, per omnes Davidis ire & tates, Sed alias à prima pu

B 2

eritia pluri-
rimis vir-
tutib⁹ præ-
stans.

tates, & quantis virtutum ornamentis domi in paternis adi-
bus pueritiam & juventutem, quantis postea foris adultiorem
& virilem ætatem, quantis ultimam senectutem condecorarit,
percensere. Seriam pietatem & timorem Numinis haut fuca-
tum omni tempore ab ipsis incunabulis ducem habuit: inde
manavit singularis erga parentes reverentia, ad quorum nu-
tum quosvis labores domesticos promptè subjicit, alacriter expe-
divit, inde erga fratres amor & tuendæ concordia conatus, inde
in aula regia erga Saulem fides ad negotia omnia, quantumvis
cum extremo vitæ periculo conjuncta, alacriter conficienda,
inde porro magna & admirabilis patientia, qua casus adver-
sos, metu in primis Saulis, jurati hostis sui, fere decennium, for-
tissimè tulit, inde inaudita & stupenda erga hostem mansuetu-
do, inde, cum superatis periculis, regni adeptus esset admini-
strationem erga Deum gratitudo, religionis tempore Saulis
collapsæ instauratio & confirmatio, justitiæ inter subditos tu-
endæ studium, inde postmodum, cum filii Absolonis seditione
regno pelleretur, prorsus incomparabilis voluntatis in divi-
nam voluntatem deditio, & quædam quasi immersio, qua se ad
perpetuum exilium &, quas hoc suo complexu continet, om-
nes calamitates exantlandas obtulit, inde virtutes aliæ plu-
res, ac tandem earundem laudatissima obsignatio, qua mori-
turus Salomonem filium regniq; optimates gravissimo sanctis-
simoque sermone ad timorem DEI, ad sincerum cultum divi-
num, ejusque conservationem & propagationem cohortatus
fuit. Factum hinc, ut insequentibus temporibus Spiritus san-
ctus in Regibus Judæ sive laudandis, sive reprehendendis, Da-
vidis exemplo, veluti regula quadam usus sit, atque eum *rectum*
justumq; prædicarit, qui eidem extitit similis, contra impium &
perversum, qui non ejus more ambulavit. De Asa 1. Reg. 15,
11. ait: *fecit in conspectu Domini rectum, sicut David pater ejus:*
eodem modo de Hiskia 2. Reg. 18, 3. Contra de Salomone 1.
Reg. 11, 4. *non fuit cor ejus perfectum cum Domino DEO suo, sicut*
cor Davidis patris ejus: Sic quoque de Abia cap. 15, 3. confer a-
pud Chrysost. homil. de Davide & Saule, itemque alteram de
Davide & Goliatho, tom 1. pag. 604. & seqq. *ubi David illu-*
stris in celo, illustris in terra dicitur, qui animi moderatione ad Ev-
ange-

angelica Philosophia fastigium pervenerit, qui millies martyrum coronam meruerit, qui homo in natura humana vitam præstiterit angelicam &c. Disputant in Papatu Scholastici, cum hanc de sanctitate Davidis materiam tractant, pro more otiosè & curiosè, an David aequè sanctus atq; Patriarcha Abraham, Isaac & Iacob fuerit, an sanctior? Qui sanctitate Patriarchis parem fuisse sentiunt, nituntur autoritate 2. Sam. 7, 9. ubi Jehova ad Davidem, feci, inquit, tibi nomen grande, juxta, nomen magnorum, qui sunt in terra, magnorum nomine tres Patriarchas modò nominatos intelligentes. Qui sanctiorem & speciatim quidem Abrahamo extitisse volunt, varia colligunt: ajunt, fuisse excellentiorem Prophetam, plura illi divinitus significata; fuisse insuper chariorem & amiciorem DEO, amplioribus beneficiis ab eo ornatum, longius etiam propagasse & amplificasse divinum cultum &c. Qui vult videat Tostat. in cap. 22. Matth. Salmeron. tom. 3. tract. 26. Pined. de rebus Salomonis lib. 1. cap. 2. pag. 10. Sebastianus Barradius tom. 1. cap. 15. pag. 204. occasione verborum 2. Reg. 23. 25. Non fuit similis Iosia ante eum Rex &c. disputat, annon David omnibus regibus virtute major fuerit? Affirmat, adducto testimonio ex Syrac. 47, 2. sicut adeps separatus à carne, sic David à filiis Israël &c. Subnequit: quemadmodum adeps à carne separatus præstantior ipsa carne hostiæ erat & sanctior, quia Deo in altari incendebatur: caro verò partim sacerdotibus, partim offerentibus cedebat: Ita David ceteris Israëlitis erat præstantior & sanctitate illustrior. Pluribus hanc similitudinem persequitur Pined. cit. loco, sed talibus quæ scriptione indigna videntur.

12. Quamvis verò præ infinitis aliis pietate & sanctimonia insignis, pro ratione fragilitatis & infirmitatis vitæ hujus, David fuerit, in gravia tamen & atrocia lapsus est peccata, de quibus in textu nostro loquitur: lapsus, Diaboli instinctu & suggestionem, proprioq; vitio, securitate, curiositate, otio, non verò ex vi & efficacia arcana voluntatis seu decreti divini, quod ipso opere docent, qui non sine horrenda blasphemia scribunt: DEUM velle, decernere, procurare hominum peccata, eorumq; opera insana, frustra crudelia: velle atque efficere ut impij in concupiscentiis vivant: qualia ἀνθρώπων φαστικώτατα olim, ut pluribus aliis, ita Johanni Piscatori valde fuerunt familiaria, ut ex variis ejus

Davidis
Peccatum.

Nequaquā
à Deo pro-
curatum.

scriptis, præcipuè iis, quæ contra Schaffmañum, Bertium, Doct.
Taufterum, Vorstium edidit, liquet: in quibus disertè *DEUS*,
inquit, *cum opera hominum omnia procuret* (quippe per quem vi-
vimus & movemur *Act. 17.*) *procurat utiq; etiam opera illorum stul-
ta & crudelia & insana &c.* confer *Act. Synodal. Remonstrant.*
*part. ult. syllabum testimoniorum, quibus Contra Remonstran-
tium sententia de gratiæ operatione exhibetur pag. 48. & seqq.*
Nihil hujusmodi historia sacra innuit vel minimo indicio, cu-
jus divinus ac immediatè illuminatus scriptor, cui omnino
mentem suam aperuit Spiritus sanctus, posteaquam atrocita
Davidis peccata per omnes circumstantias recensuit, caput 11.
tali claudit epiphonemate. *Displicuit id, quod fecerat David,
in oculis Iehovæ.* Displicuit, ergo non procuravit, ubi in distin-
ctione inter voluntatem signi & beneplaciti estugium quærere vel-
le, intolerabile est. Nam non admittit phrasis, *in oculis DEI*,
quæ alteri *in corde DEI* per omnia respondet. confer. *Gen. 6, 6.*
8, 21. Jer. 7, 30. 31. 19, 5. 32, 5. unde *oculi & cor* conjunguntur
1. Reg. 9, 3. 2. Chron. 7, 16. Jam quemadmodum quod *in cor-
de Deo displicet, ipsi per omnia displicet* atque in primis interiori &
essentiali justitiæ adversatur, quæ suo modo ipsum ejus cor est:
sic quoque quod *in oculis eidem displicet, absolutè atq; omnibus mo-
dis displicere credendum est*, ut proinde ab eo procurari nulla
ratione queat. Omittimus, quæ contra monstrosam o-
pinionem seq. 12. cap. 2. Sam. ex missione divina Nathanis
Prophetæ ad Davidem, ex ejus concione & comminatione, ex
Davidis pœnitentia &c. argumenta numero plurima, robore
invicta sua sponte se offerunt, unde etiam Petrus Martyr com-
mentar. in 2. Sam. 11. pag. 236.. b. ad verba: *Displicuit Iehovæ,*
significanter, ait, habemus, factum Davidis displicuisse Domino, &
*Piscator ipse in observat. 8. ad dictum caput: DEUS peccatis ele-
ctorum offenditur: quod uti verissimum est, ita falsissimum esse*
neccesse est, DEUM ea occultè procurarre. Sed de his alibi ube-

Quod du-
obus no-
minibus
describitur

פשע

rius.

13. Caterùm duo distincta textus noster Davidici peccati
nomina habet. Prius est פשע à פשע defecit rebellavit, præ-
varicatus est. Veteres hæbreorum æquipollere ajunt verbo
פשע quod est exire à voluntate, vel potestate, vel præcepto Domini
ex su.

*ex superbia. Confer Pagnin. Lexic. pag. 2259. sed ex locorum
 scripturae collatione liquet, longè patere latius, & generaliter
 etiam significare legem quocunq; modo transgredi, pactum vel præ-
 ceptum violare. Unde חשע defectio, rebellio prævaricatio. Chal-
 deus per vocabulum ܚܪܝܕ quod propriè rebellionis grande sce-
 lus notat, transtulit, de quo plura apud Buxtorf. Lexic. Chald.
 Talmud. pag. 1251. Græci generalissimum nomen hîc habent
 ἀνομία, qui alibi per παράνομον, ἀσέβειαν, ἀσέβειαν, reddiderunt;
 quos etiam Latinus vulgatus secutus est, qui, cum hoc loco vo-
 cem iniquitas usurpet, alibi per alia scilicet delictum, injustitia,
 scelus, ignorantia, impietas transfert. Posterius est חטא à חטא
 verbo generali quod significat errare quocunq; modo deviare,
 deflectere: extat Jud. 20, 16. ubi septingentorum funditorum
 fit mentio, quorum tanta fuit periticia, ut quisq; illorum funda
 mittens lapidem ad capillum sine erratione mitteret: quæ verba sa-
 cram habent hyperbolem, qua summa jaculatorum describitur
 experientia, per quam rem quantumvis parvam tenuemque at-
 tingerent, nec aberrarent, qua cum nonnulli conferunt. Job.
 5, 24. visitabis speciem tuam (juxta hebraic. habitaculum tuum)
 & non peccabis, id est, non aberrabis, sed facilè invenes, unde
 quidam חטא dici arbitrantur, quasi חטא חטא à filo vel li-
 nea & perpendicularo declinavit & deflexit. Specialiter tamen &
 creberrimè quidem in scriptura sacra significat aberrare à lege
 divina, contra eam peccare & delinquere, unde nomina חטא
 peccator, transgressor legis, & חטא peccatum in genere omne,
 sive majus, sive minus, sive erratum, sive scelus, sive ex infirmi-
 tate, sive contra conscientiam committatur: aliquando tamen
 etiam peccati poenam denotat, itemque expiationem & piacru-
 lum sive sacrificium expiationis. Græci ut hic loci, sic & alibi
 frequentissimè reddiderunt per ἀμαρτίαν ab ἀμαρτάνω, quod i-
 plum quoque verbum idem est, quod apud Latinos à scopo ab-
 errare, in negotio aliquo & actione. confer. loc. cit. Jud. 20,
 16. ubi periti jaculatores dicuntur ἀμαρτάνοντες: deinde ve-
 rò ad legis divinæ violationem & transgressionem exprimen-
 dam adhibetur. Vulgata versio nomen peccati habet de cujus
 varia apud varias Etymologia antehac disp. de peccato in ge-
 nere §. 11. egimus, confer Martin. Lexic. pag. 2563.*

14. Duo

14. Duo hæc nōmina cum alijs, uti dictum, generalis sint
 Et nequa. significationis, & quamcunque transgressionem legis divinæ
 quam leve denotent, quo sensu hoc loco accipienda, ex ipsis historiæ &
 & excusa- totius Psalmi circumstantiis est conspicuum. Non certè le-
 bile. vius aliquod ex infirmitate aut ignorantia perpetratum pecca-
 tum, sed atrox & grande flagitium, neque unum tantum, sed
 multorum *συνεργούντων* & concursus designant. Rabini quidam,
 notante Nicolao de Lyra & Dionysio Carthusiano, Davidis a-
 dultorium excusare moliti sunt, & tradiderunt, *Bathsabeam ab*
Vria, cum militia nomen daret & in bellum, Archistratego Ioabo,
ad expugnationem Rabba proficisceretur, repudiij libellum usitato
militum more, accepisse: sed audacissimū & intolerabile hoc fig-
 mentum esse, plurima ex historiæ consideratione emergentia
 argumenta clarum faciunt. Confer Alphons. Tostat. in 2. Re-
 gum (Samuelis) cap. 11. quæst. 8. pag. 106. copiosius pro mo-
 re de hac Judæorum fabula disputantem. Non desunt, qui, si
 non per omnia, ex parte tamen aliqua, aut saltem ad apparen-
 tiam adulterium Davidis posse excusari sentiunt. Ajunt, adul-
 terium uno duntaxat actu, adeoque non ex inveterato habitu, itemque
 non ex deliberatione prævia, sed derepente & ex improviso Davidem
 commisisse, quod ex historia verbis, accidit, ut surgeret David &c.
 constare arbitrantur. Insuper, peccato perpetrato, adulteram su-
 bito in domum suam remisisse, ut legalem purificationem de more
 Iudaico obiret, unde rectè colligatur, eum unà tantum vice, mari-
 to superstito, cum ipsa peccasse: quæ omnia aliquatenus saltem & à
 nimia atrocitate ac gravitate adulterij peccatum excusent. confer
 Julii Mazzarini super Psalm. 51. discursum septimum lit. E. &
 seqq. pag. 50: ex quo desumit, quæ sua fecit, Fornerus in Rege
 Hebronensi & explicatione Psalmi 51. conc. 1. pag. 7. Verum si
 per omnes eamus flagitiorum circumstantias, tanta eorum ob-
 oculos sese ponit atrocitas, ut satis verbis exprimi nequeat. A-
 dultorium quantum in se scelus? quanta severitate in sacris li-
 teris & Decalogo prohibitum? quod malorum radix est? quàm
 graviter omnibus seculis à Deo punitum? quanto hinc studio
 à pijs bonisque omnibus evitatum? Eodem modo homicidii,
 cujus primus patrator, Christi Salvatoris pronunciato, Diabo-
 lus est, quis immanitatem unquam satis sermone exposuit?
 quo

Sed longè
 gravissimū
 atque atro-
 cissimum.

quo leges naturales, divinæ, civiles, evertuntur? Atque hæc scelera cum in se sint abominanda, à quo tandemcunque peragantur: magis tamen horrenda & detestanda fiunt, si à Rege admittantur, & tali quidem, qui, præ infinitis aliis, divinæ sapientiæ lumine & rerum sacrarum scientia sit præditus. Nota est Satyrici sententia:

Omne animi vitium tantò conspectius in se
Crimen habet, quantò major, qui peccat habetur.

Neque verò adulterij tantum & homicidij reus David fuit, sed aliorum criminum plurium, quæ illa partim antegressa, partim secuta sunt, turpis otii, curiositatis, perfidiæ, cædis plurimorum subditorum, securitatis, atque ipsius indurationis, ex qua diu satis gravissima flagitia nec agnovit, nec de pœnitentia cogitavit. Accessit horrendum scandalum quod toti dedit populo, ac blasphemare etiam fecit inimicos nomen Domini. 2. Sam. 12, 14. ad quæ verba Salvian. lib. 4. de gubern. pag. 153. Qui blasphemare alios peccans fecerit, necesse est peccatum huius supra criminis humani esse mensuram, quia per convitia plurimorum inestimabilem DEO facit injuriam. Lutherus noster in præfat. enarrat. Psalm. 51. tom. 4. lat. pag. 372: In Davidis, ait, facto plura, quam unum cum Bathseba peccatum videntur: adjicit enim adulterio pessimum consilium de occidendo Vria, adornat ipsam cædē Vrie & simul aliorum plurium Israëlitarum, blasphematur nomen Domini, & sic ultra quintum, & septimum præceptum progressus, etiam in primum, secundum & tertium præceptum peccavit: Ergo insigne exemplum est David, sic ordine in totum fere Decalogum impingens &c: Et paulò pòst: Vir tantus prolabitur non in unum leve peccatum, sed in monstra plurium peccatorum simul: & quod periculosissimum est, prolabitur in impœnitentiam & altam securitatem, adeo ut si Nathan non venisset, David fortè peccasset in spiritum sanctum &c.

3.
Peccati a.
gnitio.

15. Hoc peccatum, id est, peccatorum densum quoddam agmen, tandem agnovit, sibiq; in conspectu posuit David. Ait enim: Iniquitatem meam ego cognosco, & peccatum meum coram me est. Hebræum אָרַם אֶת־עֲוֹנוֹנ est verbū amplissimi usus: significat enim scivit, novit, didicit, intellexit, expertus est, approbavit, Non nuda sed cum affectu cō-juncta. fovit, inspexit, misertus est, honoravit, curavit, benefecit, videndi Lexicographi, in primis Pagninus. Hoc loco, quod non nu-
dam

C

Nec tamen
tali qualis
est securè
impiorum.

Desperan-
tium.

dam scientiam aut cognitionem omni affectu vacuum, sed cum variis conjunctam animi motibus denotet, per se manifestum est. Qui motus quales sint, ex verborum serie atque ardentibus patescit gemitibus. Cognoscunt etiam impij quidam & securi sua cum affectu peccata, sed tali, ut de iis latentur & gaudeant: latantur inquit Salomon Prov. 2, 14. cum malè fecerint, & exultant in rebus pessimis, quorum via perversa sunt. Ambros. in h. l. tom. 4. pag. 385. pleriq; in suis lapsibus gloriantur & putant, ea laudè esse que crimini sunt: alienum coinquinare thorum, hominem occidere, rapto vivere, circumvenire & fallere, virtutis & sapientia esse putant &c. Tales extiterunt ex Judæis nonnulli, de quibus Jesa. 3, 9. Agnitio vultus eorum respondit ijs, (Lutherus ad Hebræum reddidit Ihr Wesen hat sie kein heil) & peccatum suum, quasi Sodoma, predicaverunt nec absconderunt: confer. Jer. 11, 15. In malitijs tuis gloriata es &c. ut & Psalm. 52 3. Sunt affectus istius agnitionis peccati omnium maximè abominandi: non enim scelus altius ire potest, quàm si ex eo gaudium capiatur, hæc extrema est impietas atque ejus *ἀκμή*, qua de re Salvianus lib. 7. de gubern. pag. 280. Solet res flagitiosa, quando agitur occultè, fidem facinoris non mereri: supra autem omnem monstruosi piaculi execrationem est, scelus summum admittere, & pudorem sceleris non habere &c. Tales, quod unum adhuc habebant in malis bonum, perdunt, peccandi verecundiam: laudant enim ea, quibus erubescant & vitio gloriantur, inquit Seneca lib. de vita beat. cap. 12. apud Rittershusium commentar. in Salvian. pag. 318. Deinde peccata sua quoq; cum affectu cognoscunt, qui desperant: peccatum fratricidii gravissimum esse, agnoscit desperabundus Cain Gen. 4, 13. similiter Saul, Achitophel, Iudas, scelera sua agnoscunt, sed ut ad horrendam eorum larvam nimis contremiscant, & omnem consequendæ gratiæ spem abjiciant. Verùm talis affectus in Deum ejusque veritatem, misericordiam, promissiones, in meritum Christi ejusque efficaciam & amplitudinem blasphemus est. Alios planè affectus animo habet David, cum ait: Iniquitatem meam ego cognosco. Non latantis, sed intimè dolentis verba sunt. Expendit tecum diligenter atrocitatem suorum peccatorum; expendit multitudinem singularium planeq; extraordinariorum beneficiorum, quibus, præ
infini-

infinitis aliis, à DEO non affectus tantum, sed cumulus fuit;
 expendit detestandam *ἀχαριστίαν* & horrendum eorum abusum;
 expendit inde iram DEI consumentem, quam adversus se con-
 citavit; expendit ex ira maledictionem & pœnas temporales
 & æternas, quas promeruit, inde mœtor oritur & tristitia, qua
 DEum super omnia diligendum, peccatis suis gravissimè læ-
 sum, deplorat, inde lugubres & lamētis plenæ voces, quas per
 psalmos pœnitentiales legimus, ut ita verborum Davidis, ini-
 quitatem meam eo cognosco, sensus sit. *Iam quid peccatum*
fit meum, re ipsa experior, sentio detestandos sœdissimi adulteri, cru-
delissimi homicidæ, aliorumq; scelerum iis conjunctorum fructus, o-
ter quaterq; horrendos! Video, quantis iam sim exutus bonis, quibus
pridem abundavi, quantis contra malis sim obrutus, quibus liber fui,
versantur ante oculos terribilia facinorum spectra, ante aures for-
midabilia comminationum & maledictionum fulmina: ad quæ toto
pectore contremisco, toto corpore perhorresco & concutior: heu me
omnium miserrimum! Hos enim Davidis, posteaquã ad peccato-
rem suorū perductus est agnitionem, fuisse interiores affectus,
 externas voces gestusque, ex pœnitentialibus psalmis satis est
 manifestum. Sed tamen, inter hosce pavores animi & con-
 sternationes, nō despondet animum aut succumbit, sed mente
 ad immensam DEI misericordiam & clementiam, ad beni-
 gnissimas promissiones, ad aliorum, qui per pœnitentiam pec-
 catorum remissionem consecuti sunt, exempla conversus, sp̃e
 meliorem concipit, eaque sese erigens dolorem mitigat: quin
 ex ipsa peccati agnitione, quam à DEo requiri novit, benè spe-
 randi materiam haurit.

Sed qui
 conjunctā
 habet sp̃e
 gratiæ.

16. Ast unde hæc in Davidico pectore peccati agnitio? Ille
ἐγώ inquit, *iniquitatem meam agnosco*, quæ verba ipsum Da-
 videm hujus agnitionis operantem causam facere videntur,
 quod, cum aliquamdiu peccatis indulserit, parumque ea cura-
 rit, tandem arbitrii sui viribus ea ad animum revocare, deque
 iis dolere inceperit. Verum, si, quæ ipsius ex eo momento,
 quo in adulterium impiè consensit, fuerint consilia, studia, a-
 ctiones, consideremus, tantum abest, ut eum à seipso ad pecca-
 torum agnitionem se erexisse, ut potius è contrario longius
 subinde atque longius ab eadem avocatum fuisse, manifestè
 C 2 depre-

Cujus ag-
 nitionis
 nō ipse ex
 viribus su-
 is operans
 causa fuit.

deprehendamus. Nam ubi scelus fuit patratum, adulteram in aedes suas dimisit, per omnia similis illi, *quæ comedit, & tergit os suum, & dicit secum: non sum operata malum.* Prov. 30, 20. Paulò post, cum Bathsebam ex nefando concubitu esse gravidam, accepit, ut facinus contegeret, varia machinatus est, & castris Uriam vocavit, & ut descenderet in domum ad uxorem suam, monuit, alienum, quantum in se, hæredem suppositurus: quod cum ex voto non succederet, postridie eum ad se invitavit, atque epulis & crapula ad conjugalem cum uxore consuetudinē permovere conatus est: sed cum nec hoc, ob singularem Uriæ pietatē, per quam etiam licita voluptate, in Reipubl. periculo abstinere secū firmiter constituerat, obtineret, ad homicidiū nefario decreto prorupit, Ducis Joabi opera, ad flagitia sua abusus est, & ut Uriam virum sanctum, fidum, fortem, innocentem, imò de Republ. singulariter meritum, inter heroas 1. Chron. 12, 41. numeratum, & medio tolleret, mandavit: mox allato de Uriæ cæde nuncio, gavissus est, sibi gratulatus, ac Joabum sceleris socium hortatus, ut strenuè rem urgeret, nec animo frangeretur, consolatus simul, more planè ethnico, & communibus belli eventis, & quod per Martem ἀλλοπερὶ ἀλλοιῶν interdum hi, interdum alii gladio pereant: tandem nequid deesset, adulteram in domum suam recepit. 2. Sam. 11, & seqq. Nullum in his omnibus seriæ ac salutaris peccatorū agnitionis vestigium, argumenta verò auctæ indies, integro ferè anno, securitatis, cæcitatis, indurationis haut pauca. Venit autem tandem, jussu divino, Nathan Propheta, & parabola piè ingeniosa grande Davidi exprobravit facinus, quod cum ipse plures haberet uxores, nihilomin⁹ furore libidinis accensus, Uriæ unicam & charissimam conjugem rapuisset & violasset, quin & optimum maritum gladio Amonitarum occidisset: cui exprobrationi gravissimas subjunxit minas, fore ut gladi⁹ de domo ejus non sit recessurus in seculū, ut ex ipsa ejus domo inexpectati hostes, variaq; calamitatum flagella, sint proditura. 2. Sam. 12, 1. & seqq. Atq; hac concione Davidi quodam modo mentis oculi, quos sat diu hætenus securitas clausos tenuerat, aperti sunt, ut in se redierit, peccata sua, eorumque atrocitatem agnoverit, deque iis doluerit, & seridū quidem: Tametsi enim historia 2. Sam. 12,

3ed DEus
per Pro-
phetæ Na-
thanis cō-
cionem.

Sam. 12, 13. rem totam una voce *peccavi* exprimat, plurima tamen & maxima eadem comprehendit, nimirum omnia suspiria, gemitus, preces, clamores, lacrymas, vigilias, quibus integras noctes impendit. Testes sunt Psalmi pœnitentiales, qui, in verbum *peccavi*, illustria commentaria continent & exhibent. Omnia hæc Nathanis Prophetæ concio operata est, qua sine David suis arbitrii viribus peccati veterum non modò non excussisset, sed & amplius eodem fuisset oppressus. Augustinus in Psal. 51. tom. 8. pag. 486. David, inquit, aliquamdiu post tergum ponebat, quod fecerat, suiq; oblitus aliene iniquitatis se-
 verus admodum, quamvis iustus iudex erat, verum ubi Nathan peccatum ejus auferebat à dorso & ante oculos ponebat, ad secandum & sanandum vulnus cordis ejus ferramentum faciebat de lingua ejus, dicens ei: Tu es ille vir &c. Inde igitur non tantum ibi erumpebat in hanc vocem: *peccavi Domino*, sed etiam hoc loco inquit, iniquitatem meam ego cognosco. Ergo David, licet, ego, dicat, iniquitatem meam cognosco, nequaquam tamen ex seipso hanc se excitasse cognitionem, asserit, sed divinam in se, per concionem Nathanis, operationem & efficaciam, cui non sit reluctatus, veneratur & deprædicat, ut sensus sit: Ego, qui hæcenus densissimis quodammodo securitatis tenebris immersus, atrociora peccata à me commissa non curavi, de iis non dolui, jam, posteaquam Iehova Prophetam ad me misit præconem pœnitentia, novo lumine sum imbutus, ex quo nata peccatorum meorum vera agnitio, serius dolor, primus salutaris ad DEUM conversionis gradus, non obscurum ventura gratiæ inditium. Iam non amplius, ut pridem, peccata mea abscondo, sed ostendo, accuso, non excuso, spe bona fretus, fore ut quo maiore humilitate ego peccatum meum agnosco, hoc majori gratia DEUS ignoscat; magna DEI bonitas, quæ peccata revelat, ut deleat!

17. Seriam minimeque fucata esse iniquitatis agnitionem, Ex qua factum, ut
 intra animum suum, amplius confirmat David, cum subjun- peccatum,
 git: *peccatum meum coram me est.* Hebræo *לפני* à *לפני* respon- quod pri-
 dent Latina, *coram*, ante, contrā, è regione, ex opposito, è longinquo dem non
 &c. Latini interpretes nonnulli per præpositionem *coram*, qui curarat, ip-
 dem per alteram *contra*, quidā promiscue reddiderunt. Utraq; si in cōspe-
 significatio non incommodè retinetur, imò ex consideratione ctu sit pos-
 pœnitentiæ Davidicæ retinenda est, quanquam prior præfe tum & co-
 rendam.

renda sit. Nam David præcipue id agit, ut ostendat, (quæ Augu-
stini verba sunt) *se non ponere post dorsum suum, quod fecit, non in-
tueri alios, sui oblitum, non affectare stipulâ ejicere, de oculo fratris
sui, cum habeat trabem in oculo suo, non deponere ejus memori-
am, sed semper revelare, recordari & ante oculos habere. An-
te lapsum læta mente, serena conscientia, hilari fronte & lin-
gua dixerat: non impiè descivi à DEO meo, quia omnia judicia ejus
coram me & statuta ejus non abjeci à me. Psal. 18, 22. & 23. legem
divinam semper in conspectu habuerat, ad hanc retulerat men-
tem & oculos, ad hujus præscriptum instituerat vitam suam,
in hac voluntas ejus & meditatio die ac nocte Psal. 1. 2. Iam post la-
psum è contrario tristi pectore, animo perturbato, vultu & ore
squalido dicit: peccatum meum coram me est; horribile mon-
strum, ad cujus intuitum miser contremisco. Tametsi verò Da-
vid hoc præcipue spectet, simul tamen tacitè conqueritur, pec-
cata sua, quæ coram videat & contempletur, contra se stare, esse
hostes suos truculentissimos, acerbissimos accusatores, testes
molestissimos, tortores crudelissimos, flagella durissima &c.
jam sentire se & experiri vim divinæ comminationis Psal. 50,
21. Arguam te & statuam contra faciem tuam, quia cum adulteris
portionem posuisti. Atque ita idem ferè dicit, quod postea Ju-
dæi Esa. 59, 12. multiplicata sunt iniquitates nostræ & peccata
nostra responderunt nobis, quia scelera nostra nobiscum & iniquita-
tes nostras cognovimus &c. Varia & multiplicia peccata, quæ pa-
travimus, magno & hostili agmine in conspectum nostrum
prodeunt, nos accusant, contra nos testantur, & una voce, ut
perdamur & deleamur meruisse, clamant: qua ratione etiam
Ambros. in Apolog. David. priori cap. 9. tom. 4. pag. 385. vo-
cem coram intelligit: ubi piè graviterque, insipiens, ait, delecta-
tur erroribus suis & novis vetera obumbrando peccatis se existimat
adjuvari, ideoque exultat in crimine. At vero sapiens adversum se
judicat esse delictum suum & tanquam hostiles acies; ita lapsus cul-
parum suarum adversantium modo sibi arbitratur obistere: quic-
quid personaverit, quicquid increpaverit, culpa ei propria semper oc-
currit, quicquid fuerit dictum aut lectum, in se dictum putat: quic-
quid intenderit, se nutu, se oculis signari putat: si epuletur, si cogi-
tes, si oret ac deprecetur, ante oculos semper est error proprius, &
momentis*

momentis omnibus culpa pulsat conscientiam, nec quiescere, nec ob-
livisci finit, velut gravis censor exagitat se terrore perpetuo: omnia
igitur adversa habet, qui ipse sibi displicet, ipse sui accusator, ipse sui
testis est, nec invenit, quod fugiat, quippe se perurget & stimulat. Sed
hoc bona mentis est, vulnus sentire peccati: ubi enim doloris sensus
est, ibi etiam est sensus vitæ: sentire enim vitalis vigoris ac muneris
est &c. Nec aliter Lutherus noster, qui verborum, peccatum
meum coram me est, hanc subnectit παραπονοίη: incumbit cervici-
bus meis, premit me, non possum eo planè liberari, urget, nō admittit
ullam quietem, non pacem, non vino, non pane, non somno excutitur
&c. Hunc esse verborū sensū, versiculorum σὺν ἡμεῖς ostendit, ubi
tamē nō rejicim⁹ Brentii sententiam, qui de peccato originali
Davidem loqui arbitratur: Quod est illud peccatum, inquit, quod
coram Davide est? Originale. Hoc enim peccatum David fa-
tetur semper esse coram se & in conspectu suo, quia caro, in qua hoc
peccatum habitat, semper concupiscit adversus spiritum, & homo
volens facere bonum semper reperit, quod malum ipsi sit adjunctum
&c. Rectè sanè, si non exclusivè dicta intelligantur: à pecca-
tis enim actualibus, quæ coram se habuit David, ad fontem &
radicem eorum peccatum scilicet originale descendit: atq; i-
ta & maledictam arborem & pestilentes fructus ob oculos sibi
posuit.

18. Superest hujus agnitionis peccatorum perpetuitas & perse-
verans continuatio. Transierat nefandus adulterii cum Bathseba ^{4.} Agnitio-
actus, transierat crudelis homicidii patratio: at non ita etiam ^{nis perpe-}
David transire patiebat scelerum considerationem, deque iis
animo dolore conceptum, sed eorundem assiduè recordaba-
tur: redibat per intervalla in memoriam atq; oculis sese men-
tis sistebat occasio, ex qua in crimina tam gravia prolapsus fu-
erat, *otium, curiositas*: sistebant se *flamme libidinis*, quibus in-
census Bathsebam vocarat, sistebant *impura colloquia & persuasi-*
ones, adeoque ipse *flagitiosus* cum adultera, quam blandimen-
tis suis seduxerat, *congressus*: redibant etiam impiæ machina-
tiones, quas ad tegendum & occultandum vitii alieni thori
crimen excogitarat, redibat callida Uriæ à castris revocatio &
inebriatio, sanguinariæ & crudeles ad Joabum literæ, ipsa vi-
ri & religiosissimi & fortissimi cædes, subditorumque aliorum
plurium

plurium in hostium manus perfidiosa traditio. Hæc terribilia spectra in conspectu habebat semper רַבִּיר Hebræum est, quod cum nomen sit, cui latina *continuus*, *perpetuus*, *jugis* respondent, adverbialiter tamen plerumque usurpatur, sed sensu diverso. Nam interdum *omne tempus* & continuam durationem sine intervallo denotat. Confer Levit. 6, 12. Num. 4, 7. Phil. 4, 4. 1. Theff. 5, 16. aliquando item valet quod *crebrò*, frequenter, sæpissimè. Deut. 9, 7. *ex eo die quo egressus es ex Ægypto semper* (juxta vulgatam versionem, in Hebræo enim non extat) *adversum Dominum contendisti* v. 24. *semper fuisti rebellis* cap. 31, 27. *semper contentiosè egisti contra Dominum*, id est, sæpe, crebrò, arrepta quacunq; occasione. Nam quod non indefinenter, omni die & hora, per tot peregrinationis annos, contenderint, ex historia sacra constat: imò interdum piè religiosèq; sunt locuti. Exod. 19, 8. *Cuncta, quæ locutus est Dominus, faciemus*, piè etiam ac religiosè fecerunt cap. 35, 20. & 21. *Omnis multitudo filiorum Israel obtulerunt, mente promptissima atq; devota, primitias Domino, ad faciendum opus tabernaculi testimonij.* Ergo *semper* idem est, quod *frequenter*, sæpissimè: quo etiam sensu accipienda verba Psalm. 95, 10. *quadraginta annis offensus fui generationi illi, semper hi errant corde*: itemque saluatoris Christi Luc. 18, 1. *Oportet semper orare & nunquam deficere*: ubi nonnullis *τὸ orare est operari*, sive bonis vacare operibus, id quod perpetuò à Christiano homine requiritur: aliis *vita beata & eterna* flagrare desiderio, quod ipsum quoque perpetuum esse debet. Sed ex ipsa parabola, quæ statim subnectitur, manifestum est, *τὸ semper æquipollere τῷ frequenter*. Vidua enim non continuè nocte dieque in clamavit in iniquum judicem, *vindica me de adversario*, sed sæpe, frequenter, per intervalla, crebrius eodem die, nec desit, donec expugnavit animum ejus, & quod voluit, obtinuit: ita Christi monitum non simpliciter continuationem & perpetuitatem, sed iterationem & constantiam in precibus exigit, ut si mâne ad preces auxilium non feratur, vespere eadem repetantur: si hodie ex voto non impetremus, quod petimus, postero die ad eandem orationem redeamus, nec ex tædio aut desperatione eam intermittamus: Non enim decet ἐκκαλεῖν, sed perseveranter instare: Non ta-

men

men rejicitur eorum explicatio, qui de mentali oratione & affiduis cordis affectibus, aut de corde ad pias preces semper parato Christi verba accipiunt. Confer Lutheri enarration. orat. Domin. tom. 1. Jen. germ. pag. 69. a. ubi ait: de spiritali oratione dicta sunt verba, oportet semper orare. hæc enim semper fieri potest etiam in externis laboribus &c. Piè Basilius homil. in martyrem Julittam tom. 1. pag. 317. & seq. ad verba Apostoli. 1. Thess. 5. sine intermissione orate: Non oportet orationem plenè in syllabis constituere, sed simul in actionibus, quæ per omnem vitam intento studio perficiuntur ad præscriptum virtutis juxta Paulum: sive comeditis, sive bibitis, sive quid facitis; omnia ad gloriam DEI facite. Ergo accubens mensæ ora, esitans panem largitori gratiam repende, suffulciens corporis vires vino, fac memineris ejus, qui te hoc dono impertivit: tunicam indueris? gratias agito benigno datori: amicum pallio? fac in te augeat intentior erga DEVM charitas. Confer reliqua in hanc sententiam plura. Hoc loco vocem *דָּוִד* semper idem Davidi esse, quod crebrè & frequenter, nemo dubitabit, qui vitæ ejus actiones & labores officii expendet: nam hisce etiam pars temporis non minima danda fuit. Ut ita sensus sit: quando vesperi, mane & meridie (Psal. 55, 18.) ad te clamor, peccatum meum menti meæ obversatur, quando media nocte surgo ad confitendum tibi (Psal. 119, 62.) peccatum primas occupat cogitationes: quin etiam non rarò ipsis officii laboribus se immiscet atque ingerit, adeoque rarò me quiescere & respirare sinit. Eximia pietas circa grandem impietatem! magna virtus circa grave scelus! qua & misericordiæ divinæ agnitio ac memoria constanter custoditur, & mens contra carnalem securitatem præmunitur. Quæ secum ponderans Chrysost. homil. 2. in Psal. 50. (51.) pag. 742. exclamat: *ὦ γενναία ψυχή*; ô generosa anima, ô mentis integritas: non est oblitus peccati sui & iniquitatis, quamvis remissa fuerit, ille tamen in conscientia sua, quanquam in imagine, adulterium & homicidium depictum habuit. Considerat DEI reipsa ad se factum verbum: Ego sum, qui deleo iniquitates tuas, tu verò memor eorum esto, idq; ideo, ut gravior sit misericordia mea, ut sentias, quid tibi remiserim &c.

19. Habemus, uti arbitramur, germanum verborum Da Loc. de
D vidis, Contritio-

ne pœni-
tentiali,
ubi

1.
Præmitti-
tur brevi-
ter confi-
deratio nō
nullarum
pœniten-
tiarum.

Distinctio-
rum.

vidis, in quibus, præter alia plura, doctrina de priore pœnitentia membro scilicet Contritione sedem suam habet, sensum: cui nunc ipsius articuli methodicam delineationem subnectimus, ubi quod innuimus, nonnulla de quibusdam pœnitentia distinctionibus, præcipuè partium ejus, tum olim, tum hodie institutionis enumerationib⁹ præmiserimus sed breviter ac paucis. Nā vel omnes huc producere, quæ unquam traditæ sunt, vel in producendis singulis diutius subsistere, easdemque in accuratius vocare examen, pauciores paginarum, quibus hæc exercitatio includenda est, non permittunt.

20. Distinctiones variae sunt, quas variae Scholasticorum in Papatu disputationes olim cumularunt, apud quos alia pœnitentia est desperativa, alia salutifera, item alia interior habitus, alia pœnitendi exterior actus: rursus, alia virtus, alia sacramentum: porro, alia secreta, alia publica, alia solennis vide Lexic. Theolog. Altenstaigii à Johanne Tytz auctum, pag. 697. & seqq. Berchorius in suo repertorio distinguit pœnitentiam in simulatam, quæ sit deceptorum, desperatam, quæ sit frustratoria perversorum, condemnatam, quæ sit afflictoria damnatorum, & comprobata, quæ sit meritoria converforum. Vide tom. 3. pag. 830 de quibus plerisque omnibus quid sentiendum, facile quivis, qui vel à primo limine Theologiam salutavit, intelligit, quod nimirum quædam species suum in scriptura sacra & exemplis fundamentum habeant, aliæ ex falsis hypothesebus natæ & confictæ sunt. Fuerunt, qui pœnitentiam in legalem & Evangelicam distinguerent, & legalem dicerent, quæ in solo conscientiae ex legis fulmine & maledictione orto terrore, sine spe gratiæ & remissionis peccatorum subsistat. Evangelicam verò, quæ homo peccator serid quidem de peccatis suis doleat, sed tamen simul in promissiones Evangelicas de gratuita omnium peccatorum propter Christi meritum & satisfactionem condonatione respiciat. At hi non animadverterunt, licet forte aliqua sit pœnitentia, quæ merè legalis dici queat, nullam tamen unquam repertam, quæ merè Evangelica vocari potuerit, siquidem ad salutarem pœnitentiam Lex & Evangelium concurrunt, ac singula suas partes conferunt. Distingui etiam solet pœnitentia in Ethnicam, per quam gentiles extra

extra Ecclesiam, ex solo rationis lumine, interdum graviora scelera, quæ commiserunt, oderunt, detestantur, mallent, non commissa, tristitia afficiuntur, & Christianam, quam fideles in Ecclesia exercent, qui in Christi nomen credunt & baptizati sunt. Quæ distinctio re & opera eadem est cum illis, quæ pœnitentiam faciunt, aliam rudem, aliam formatam, aliam servilem, aliam filialem, aliam mutilam & imperfectam, aliam integram & perfectam. Notum etiam est discrimen inter pœnitentiam ingredientium, sive eorū, qui per baptismum in Ecclesiam recipiuntur, & stantium, qui quotidie piis pœnitentiæ exercitiis vacant, adeoque omnem in iis vitam, ceu decet, consumunt, & lapsorum, qui ex gravioribus peccatis, in quæ post baptismum prolapsi sunt, divina gratia resurgunt. Confer de hisce D. Gerhard. LL. CC. de pœnit. §. 33. & seq. D. Eckard, tractat de pœnit. cap. 3. pag. 45. & seqq. dispp. Lipsiensis à DD. Schiltero & Harbardo habitas pag. 628. & seqq. Wiggand. & Ind. Syntagm. Vet. Testam. pag. 1123. & seq. Nov. Test. pag. 836.

21. Partitionum sive divisionum pœnitentiæ famosissima sub Papatu est in tres partes scilicet in contritionem, confessionem oris, & satisfactionem operis, in qua quidem divisione: Bellarminus lib. 1. de pœnit. cap. 19. propos. 5. ait, omnes Catholicos convenire, idque ex divinis literis, testimoniis veterum & rationis congruentia confirmare nititur. Sed contrarium abundè D. Gerhardus demonstravit, quem vide confess. cathol. lib. 2. part. 3. artic. 16. cap. 2. pag. 18. & seqq. Nulla harum partium in scriptura sacra fundamentum habet. Nam licet ea à pœnitentibus requiratur contritionem: talem tamen, qualem Pontificii tradunt (quæ sit actus liber voluntariè assumptus cū proposito confitendi & satisfaciendi, in qua singula peccata longo tempore & amarissimè deslenda sint, ut non solum appretiative, sed etiam intensivè & extensivè summa dici possit: cuius tanta sit vis, ut quis omnium peccatorum veniam statim consequatur) prorsus ignorat, tantum abest, ut exigat. Sic confessio quidem in pœnitentiæ exercitio necessaria est & divinitus mandata: verum rursus non illa, quam Pontificij pœnitentibus imponunt, ubi sacerdoti omnia peccata mortalia, quorum quis, post diligentem discussionem, conscientiam

Partitionū
sive divi-
sionum in
1.
Contritio-
nem cor-
dis, con-
fessionem
oris & sa-
tisfactionē
operis.

am habet, recensere cogitur, etiamsi occultissima sint, neq; tantum peccata, sed etiam eorum circumstantias, quis, quid, ubi, quare, quoties, cur, quomodo, quando &c. At satisfactio, quæ est redditio æquivalentis, seu opus, quæ offensæ justitiæ DEI redditur æquale, non tantum nuspiam in scripturis invenitur, sed è diametro cum ea pugnat: est in Christi salvatoris meritum blasphema, evertit promissiones Evangelicas de gratuita peccatorum propter Christum remissione, tribuit homini, quod in vires ejus nunquam cadere potest &c. Confer de hac pœnitentiæ partitione Chemnit. Concil. Trident. exam. pag. 378. Gerhard. de pœnit. §. 57. de stud. pietat. disp. 1. §. 39. Hutter. LL. CC. pag. 761.

2.
Mortificationem & vivificationem.

22. Calvinianorum permulti suum secuti Magistrum dividunt pœnitentiam in mortificationem & vivificationem. Calvinus lib. 3. instit. cap. 3. sect. 5. pag. 204. fac. alt. meo, inquit, judicio non malè pœnitentia sic definiri poterit, esse veram vitam nostram ad Deum conversionem à sincero serioq; DEI timore profectam, quæ carnis nostræ veterisq; hominis mortificatione & Spiritus vivificatione constat. Huic non tantum subscribit per omnia, sed etiam, quantum in se, fert patrocinium Beza in absters. calumniar. Tilemanni Heshus. tom. 1. oper. pag. 307. seqq. nec minus Polanus syntagm. lib. 6. pag. 469. Sibrand. Lubbert. contra Socin. pag. 350. Bucanus LL. CC. de pœnit. q. 14. p. 297. Sed mortificatio & vivificatio, proprie sumta, sunt pœnitentiæ posteriora & fidei fructus. Est enim mortificatio actio hominis regenerati & justificati, quæ virtute Spiritus Sancti frenat, domat, compescit, reprimat & coërcet prava veteris hominis seu nativæ corruptionis motus & affectus, ne in aliquam turpitudinem erumpant. Confer Rom. 8, 13. imprimis Galat. 5, 24, ubi Apostolus, qui sunt, ait, Christi, qui per pœnitentiam ad Christum perducti, fideque ipsi uniti adeoque justificati, illi crucifigunt carnem cum concupiscentiis suis. Ex quibus verbis clarissimè patet crucifixionem, adeoque mortificationem esse pœnitentiam posteriorem. Sic vivificatio huic mortificationi opposita est actio hominis itidem renati & justificati, quæ Spiritus Sancti gratiâ, mortificato vetere homine, novam vitam ingreditur, in eâque ambulat Rom. 6, 4. id est, actiones & studia ita moderatur, ut sint utrique legis divinæ tabulæ conformia,

mia, ad honorē & cultum DEI ac proximi emolumentum diri-
 gantur. Confer Ephes. 4, 23. & 24. Coloss. 3, 10. Quia itaque
 mortificatio & vivificatio sunt actiones & opera eorum, qui
 jam per pœnitentiam DEO sunt reconciliati ac justificati, ad-
 eoque pœnitentia posteriora, partes ejusdem commodè dici
 nequeunt. Unde etiam Benedictus Aretius part. 1. proble-
 mat. loco 37. quo totam de pœnitentia doctrinam compendi-
 osè tradit pag. 453. meminit quidem hujus divisionis, sed eam
 non recipit, verùm alias ponit partes, pœnitentiæ integrales,
 scilicet *cordis seriam mutationem, emendandi propositum & spem*
venia. vide etiam Sohn. tom. 1. pag. 185. Notandum tamen ex
 nostratibus etiam esse, qui in hacce duas partes, nempe *mortifica-*
tionem & vivificationem pœnitentiam dividant. Wigandus &
 Iudex Syntagm. Vet. Test. pag. 1123. ad quæstionē, *quæ sint partes*
pœnitentiæ? hisce verbis respondet: *Partes sacra litera duas enu-*
merant, mortificationem & vivificationem. vide etiam pag. 1166.
 Sed alio planè sensu, quam Calvinus, hæc nomina usurpant, ut
 ex ipso verborum contextu liquet. Est iis *mortificatio* nihil ali-
 lud, quàm ipsa contritio & serius cordis conscientiaque do-
 lor ex legis concione operante Spiritu sancto excitatus: *Vivifi-*
catio nihil aliud, quàm certa fiducia de gratuita remissione
 peccatorum per & propter Christum ejusque meritum conse-
 quenda.

23. Recepta etiam est superioribus temporibus à nonnullis
 divisio pœnitentiæ: in *contritionem, fidem, & novam obedientiam.* ^{3.}
 Confer Phil. Melanchth. exam. Ordinandor. loc. de pœniten. ^{Contritio-}
 quæst. 2. & Chytr. Catech. itidem loc. de pœnit. q. 2. pag. 156. ^{nem, fidem}
 & seq. Verùm *bono consilio illi &c.* non attenderunt, sed la- ^{& novam}
 tius vocabulo pœnitentiæ usi, eos, quibus ministerium docen- ^{obedienti-}
 di per solennis ordinationis ritum committitur, monere volu-
 erunt, ut in articuli hujus publica è suggestu explicatione,
 quando de essentialibus pœnitentiæ partibus verba faciunt,
 perpetuo subijciant graves ad novam obedientiam & bono-
 rum operum studium exhortationes, atque ita tum securitati,
 quæ animos auditorum facilè occupat, obviam eant, tum ad-
 versariorum calumnias, quibus bonorum operum studium pa-
 rum aut nihil à Lutheranis curari clamitant, reprimant. Un-
 de Phil.

de Phil. Melanchth. posteaquam loc. cit. tres pœnitentiæ partes enumeravit, statim subnectit: *hanc partitionem docendi causa bono consilio sic tradidimus, & petimus eam sine calumniis intelligi.* Interim si, uti decet & fidei analogia postulat, quæ in se reipsa distincta sūt, accuratè distinguam⁹, novæ obedientiæ inter essentiæ aut integratæ pœnitentiæ partes loc⁹ dari non potest. Ad fructus enim ejus expressis scripturæ Testimoniis bona opera, in quibus exercitia sua habet nova obedientia, referuntur. Matth. 3, 8. Luc. 3, 8. Gal. 5, 22. adeoque sunt pœnitentiæ posteriora. Et si in rem præsentem eamus atque exempla eorum, qui seriam egisse pœnitentiam in sacris literis leguntur, inspicimus, passim hunc, de quo loquimur, ordinem deprehendimus. Dolet David de peccatis suis, misericordiam DEI implorat, eademque se solatur & erigit: pōst addit Psal. 51. 15. *Decebo iniquos vias tuas, ut impij ad te convertantur.* Confer descriptionem pœnitentiæ Israëlitarum Judic. 10, 15. seqq. Manassis 2. Chron. 33. 18. & seqq. Ninivitarum Jon. 3, 5. & seqq. Petri, Pauli &c. Quia etiam pœnitentia medium est consequendæ remissionis peccatorum Act. 3, 18. sequeretur, si nova obedientia & bonorum operum studium pars pœnitentiæ esset, in eodem spem impetrandæ gratiæ divinæ rectè collocari. Ex quibus satis elucescit novam obedientiam, licet arctissimè veræ pœnitentiæ adhæreat, partem tertiam aut de essentiæ ejus non esse: quin & illud evidenter conspicitur, non esse, ut Pezelius arbitratur, inanem λογισμὸν, si contra dissentientes disputetur: Confer plura apud D. Gerhard, LL. CC. §. 44. D. Eckard. de pœnit. pag. 58. D. Menz. exeg. Aug. Confess. pag. 545. & seq. Hutt. LL. CC. pag. 760. Brochmand. system. tom. 2 pag. 382. & seqq.

4.
Contritio-
nem & fi-
dem, quæ
sola genu-
nia est &
retinenda.

24. Stat immota solidis nixa fundamentis *partitio in Contritionem & fidem.* Hæc enim & non plures Scriptura Sacra, & in ea Christus & Apostoli numerant. Marc. 3, 15. *pœnitentiam agite,* (pœnitentia per Synecdochen hîc ut & alibi, quando à fide distinguitur, ipsa est contritio) & *credite Evangelio.* Luc. 24, 47. *Oportuit predicari in nomine Christi pœnitentiam & remissionem peccatorum.* confer Act. 2, 38. Accedit conversionis seu pœnitentiæ natura, quæ inter duos versatur terminos, à quo & ad

ad quem; ille sunt peccata, à quibus dolore, tristitia & odio abitur: hic DEUS, ad quem, spe consequendæ veniæ reditur, Act. 26. 18. *Convertantur à tenebris ad lucem, & de potestate Sathanæ ad DEVM.* Neque etiam *partitio totius doctrinæ Christianæ* alias, quàm has ipsas partes admittit. Constat ea, uti notum, *Lege & Evangelio*, quibus Spiritus sanctus ad pœnitentiam tum annunciandam, tum operandam ingenerandamque utitur. *Lex* hominum corda, ipsorum vitio, terret, prostermit, conterit. *Evangelium* solatur, erigit, sanat. Sin etiam exempla verè pœnitentium in medium producamus, omnia uno quasi ore hanc partitionem confirmant & illustrent. Adam & Eva ex eo statim momento, quo legem divinam sunt transgressi, metuunt, trepidant, fugiunt, nec eriguntur prius, quàm ex ore DEI Evangelium de semine mulieris audiant: confer pœnitentiam Davidis, Manassis, mulieris peccatricis, & in primis jucundissimam, ac nullis unquam meditationibus exhaustam parabolam de acolasto & patre ipsius Luc. 15. 11. & seqq. ubi in theatrum producit filius *primum* ex agnitione peccatorum suorum trepidans, expavescens, inde exclamans: *peccavi in cælum & non sum dignus &c.* sed mox paterni affectus & pectoris tremor meliorem spem animo concipiens & dicens: *surgam & ibo ad patrem meum*: qua parabola quid clarius non significari tantum, sed & vivis depingi coloribus posset, quàm quod omnis salutaris pœnitentia *Contritione* ob peccata, & *fiducia* consequendæ gratiæ constet & absolvatur?

25. Hanc itaque partitionem ex adductis rationibus cum omnibus orthodoxis retinentes primæ partis scil. *Contritionis* commentationi nos accingimus, quod *nomen* non, ut nonnulla alia, in certis fidei articulis, ab Ecclesia cōmodioris explicationis ergò traditum, sed in ipsis literis sacris expressè significata huic doctrinæ proprio scriptum (in concreto tamen, in abstracto, vel raro, vel nuspiam) reperitur. *Conterere* vox composita quid latinis aliàs grammatica proprietate sit, notum est, nempe idem quod comminuerè & in pulverem redigere, quo sensu extat Exod. 32. 20. ubi Moses vitulum idololatricum ab Aarone conflatum usq; ad pulverem contrivisse dicitur. confer Deut. 9. 21. cap. 23, 25. *manu spicas conteres*, inde *contritio* (vox Ecclesiasticis

2.
In ipsa translatione
consideratur
nominis
Etymologia & homonymia.

afficis, non æquè profanis scriptoribus usitata) ipse est conte-
 rendi actus sive comminutio, *Metaphoricum sensum* huic aliisq;
 locis, quibus pœnitentiæ natura, affectiones & operationes de-
 scribuntur, *proprium esse* apud omnes constat, desumptum à li-
 gnorum vel lapidum, vel metallorum, vel ossium violenta in
 minutissimas partes confractio. Confer Exod. 9, 10. 12, 46.
 23, 24. Deut. 12, 3. Jud. 7, 20. Quemadmodum enim fulmine ar-
 bor aliqua aut columna, malleo lapis & saxum, sceptro ferro
 vas figuli confringuntur, conteruntur, comminuuntur: sic
 sensu peccati & dolore inde concepto, cor hominis gravissimè
 afficitur, perturbatur, adeoque quodammodo conteritur &
 comminuitur: confer Flac. Clav. part. 1. pag. 174. *Affinis est*
iste vocabuli usus tropicus alteri, quo ad acerbissimarum cala-
 mitatum immissionem & inflictionem pœnarum crebrò in
 scripturis adhibetur. Jes. 10, 20. *contrivit Dominus plaga magna*
Reges Amorrhæorum Job. 9, 17. *in turbine conteret me & multi-*
plicabit vulnera mea: confer cap. 16, 12. & Esa. 1, 28. vide Flac.
 cit. loc. & Ravanell. bibliothec. sacr. part. 1. pag. 163. Eodem
 modo vox hebræa שבר usurpatur, nempe ut propriè signi-
 ficet confringere & comminuere Genes. 19, 9, Levit. 11. 33.
 Num. 9, 11. & passim alibi; deinde per *metaphoram* dolo-
 re animo ex peccatorum & iræ divinæ gravitatis considera-
 tione Psalm. 34. 19. & 51, 19. itemque durissimè affligi, va-
 riisque flagellari, calamitatibus, iisque penitus consumi Ps.
 10. 15. & 37, 17. Prov. 6, 15. Esa. 8, 15. Habet tamen & alias
 significationes, quas vide apud Lexicographos, inprimis
 Schindlerum & Pagninum. Nominis שבר amplior etiam
 est significatio, quippe quo non tantum fractura, comminu-
 tio, dolor, calamitas, sed & rerum obscuriorum explicatio Judic.
 7, 15. notatur, itemque frumentum, annona, cibus, alimentum
 Gen. 42, 1. cap. 43, 3. Deut. 2, 6. Amos. 8, 6. ideo sic dicta,
 quod famem frangant & conterant confer. Psalm. 104, 11. *Græci*
plerumque Hebræa reddiderunt per συντείβειν, σύντεμμα, συντε-
βής, σύντεψις, ut ex locorum collatione patet: quæ vocabula qui-
 dem propriè notant rerum diversarum collisionem, inprimis
 earum, quibus ignis elicitur. Vide Henric. Steph. tom. 3.
 column. 1345. sed tamen ejusdem quoque usus sunt, cujus La-
 tina &

tina & Hebræa. De dolore & animi tristitia, quando usurpatur
verbum συντριβεῖς non leviolem tantum, sed acerbum affectum
notat, adeoque plus est, quam λυπεῖς. Confer Henr. Steph. loc.
cit. idem de derivatis judicandum, confer. Rom. 3, 16. σύντρι-
μα καὶ πάλαι ποτὶ ἐν ταῖς ὁδοῖς αὐτῶν.

26. *Appellationes Contritionis*, quibus ejus natura compen- Synony-
diosè exprimitur, in sacris literis sunt variæ. *Percussio cordis* mia.
vocatur 2. Sam. 24, 10. quam sensit David, posteaquam man-
datum de numerando populo edidit, quæque aliud nihil fuit,
quàm morsus quidam & latratus conscientiæ, quæ, lege DEI
mota, ipsum peccati commissi monuit, accusavit, iram DEI &
pœnas promeritas denunciavit: quæ secretior concio acerbissi-
mum quodammodo flagellum Davidi extitit. Idem David in
Psalmis suis præcipuè pœnitentialibus ex ipsa contritionis suæ
praxi diversa ejus nomina profert: *conturbationem ossium* vocat
Psal. 6, 3. ubi veterū haur pauci *per ossa* præcipuè *animæ vires* quip-
pe quæ ex intuitu peccati omnium maximè afficiuntur, desi-
gnari volunt, ad cuius rei confirmationem loca alia, quib⁹ lau-
dum divinarū celebratio, aliaq; opera & affectus ossibus tribu-
untur, adducunt. Psalm. 35, 10. *Omnia ossa mea dicent, Domine,*
quis similis tibi? Psalm. 51, 10. *exultabunt Domino ossa humiliata*
confer Psal. 38, 4. Esa. 38, 13. Sed rectius *de toto homine*, ejusq;
tum animæ, tum corporis viribus, quippe quæ omnes iræ divi-
næ sensu & metu pœnatam conturbari solent, accipiuntur:
quo sensu etiam de ossibus suis dicit Eliphaz. Job. 4, 14. *pavor*
tenuit me & tremor & omnia ossa mea perterrita sunt, & ipsemet
Job. cap. 7, 15. *ossa mea elegerunt mortem*. Ergo *conturbatio ossi-*
um est summus hominis pœnitentis ē peccatorum gravitate
natus dolor & terror, quo omnes ejus vires concutiuntur, adeo
ut ne ossa quidem, quæ aliàs sensus & doloris sunt expertia, ab
eo libera sint. Confer Chrysost. in Psal. 6. tom. 1. pag. 549. u-
bi ad verba *ossa mea conturbata sunt*, ait: τὰ ὅσα τὴν ἰσχυρὴν ἀπασι-
λέγει. *Infixionem sagittarum* dicit Psal. 38, 5. *sagittarum non di-*
vini amoris & virtutum, quæ, quod mirum, Chrysostomi expli-
catio est, qui ad verba *sagittæ tue infixæ sunt mihi*. tom. 5. pag.
960. sub finem ita scribit: τὰ βέλη, ποῖα; βέλη εὐσεβείας, βέλη
δικαιοσύνης, βέλη πᾶσι πρὸς τὸν θεόν, βέλη ζήλου ἀρετῆς, τέτοις τοῖς
θεοῖς

θεοῖς βέλεσιν ἢ ψυχῇ τετρώσεται &c. sed sagittarum summi & ex-
 quilutissimi doloris. Evolarunt enim ē manu & ore DEI in
 Davidē *sagitta legi pectora transfodientes*, ut alius Graecorum Pa-
 trum loquitur λόγοι ῥύποντες, καὶ πτερώσαντες τὴν ψυχὴν καὶ τὴν
 συνείδησιν αὐτὴν τιμωρόμενοι καὶ κολάζοντες: Harum sagittarum im-
 missione cor Davidis profundissimè fauciatum est, longe gra-
 vius, quàm si corporis aliquod membrum sagitta aut telo vul-
 neretur. Similia his sunt, quod Propheta David *contritionem*
 nominat Psal. 25, 17. *multiplicationem angustiarum cordis* Psal.
 51, 19. *tribulationem Spiritus* &c. Jer. 31, 19. Ecclesia interiorē
 contritionem & dolorem animi expressura, *femur se se percutere*
 ait, externo signo secretum cordis affectum & angorem ex-
 primens. Acerbissimi enim doloris index olim femorum per-
 cussio erat, non tantùm foeminarum parturientium Jerem. 30,
 6. sed etiam virorum, qui vehementer solliciti fuerunt, aut ob
 triste aliquod nuncium graviter doluerunt: confer Zehner. ada-
 gior. centur. 4. adag. 59. Joël Propheta habet *scissionem cordis*
 cap. 2, 13. ostendens seriam contritionem cum gravissimo
 dolore conjunctam esse, ita ut interiora viscera ac cor præcipuè
 penè inde dilacerentur aut liquecant. In Actis Apostolicis
 quando Judæi grande scelus in Christi crucifixione patratum
 agnovisse leguntur, *corde dicuntur compuncti*: καταγενομένοι τῇ
 καρδίᾳ. Contritio itaque est quædam κατάνυξις τῆς καρδιάς, non
 autem eo sensu, quo Hesychius accepit, ut æquipolleat τῇ ἡσυ-
 χίᾳ quieti: qua significatione etiam Septuaginta interpretes u-
 si sunt, quibus κατάνυξις *compunctio* est sopor, stupor ac veluti
 carentia sensuum omnisque intelligentiæ. Confer Esa. 29, 10.
 Psal. 60, 5. sed ut exprimat acerrimus cruciatus, quo ani-
 mus quodammodo lancinetur & pungatur, quemadmodum
 urticarum aculeis corpus compungitur. Oecum. enarrat. in
 act. Apostol. cap. 3. pag. 22. inquit: πέτρῳ εἰς κατάνυξιν αὐτὸς
 ἦλθε. τὸ δὲ κατενύγησαν ἀντὶ τῆ ἐπαλήθευσαν, ἐπαθόν τὴν ψυχὴν ἑαυτῶν
 κατέγνωσαν: percussi sunt, senserunt animam, quæ ipsos con-
 demnabat. Plures Contritionis appellationes habent Wigan-
 dus & Judex in Syntagm. doctrin. ex Vet. Test. adornato, loc. de
 Contrit. pag. 1146. & seq.

27. *Esse Contritionem pœnitentialem cum per se manifestum*
 nec

nec facile sit, qui absolute & simpliciter neget, in quaestione
si pertractanda multum laborare velle, supervacuum foret.

De causa ejus efficiente principali si quaeratur, responsio quoque
ex præc. disp. §. 30. & seqq. penè sufficiens peti potest. Ibi e-
nim immotis sacrarum literarum fundamentus evictum est, Causa effi-
ciens prin-
cipalis Cō-
tritionis,

Idem pœnitentia adeoq; & singularium ejus partium causam effi-
cientem esse Deum Triunum, eumq; solum sine hominis cooperatione.

De Contritione in specie adducta verba Iehova Ezech. 6, 9. contri-
ti cor eorum fornicans & recedens à me, & oculos eorum fornicantes

& recedentes post idola sua, & displicebunt sibi met super malis,
qua fecerunt in universis abominationibus suis, quibus quod DEO Deus triu-
nus & So-
lus quidē.

contritionis opus in solidum tribuatur, & hinc ab ipso peten-
dum sit, ipsos etiam Jesuitas, Sanctium & Cornel. à Lapide do-
cere ostendimus. Eodem spectat certa ratione severa commina-
tio DEI Psal. 50, 21. *arguam te & statuam (peccata tibi tua)
contra faciem tuam.* Quæ ad ultimi iudicii administrationem
non incommodè quidem, rectè tamen etiam ad secretum iudi-
cium applicatur, quod DEus intra pectus & conscientiam pec-
catorum hæc in vita exercet, quando eos securitate quodam-
modo sopitos & ebrios, nec ullo pacto de peccatis suis sollicitos,
interiori metu excitat, commissa ab ipsis peccata longâ serie
è tenebris producit, ac, quæ Hebræi vocabuli vis est, veluti tur-
mas quasdam aut exercitum ordinatum mentis contemplanda
oculis sistit, unde incredibilis horror & tristitia oritur. Grego-
rius Magn. in explanat. septem psalmorum pœnitent. tom. 2.
p. 573. Optimam horum verborum habet paraphrasin, quam
adscribere juvat: *Tu, inquit Iehova ad impium, peccata tua post
tergum projicis, ne possis videre. Ego autem, qui illa video, quid
faciam? nunquid semper tacebo? imò arguam te & statuam con-
tra faciem tuam: à peccatis tuis tu avertis oculos tuos, & quan-
dam tibi vana spei securitatem promittis, & quia ipse te non vides,
quod nec ego te videam suspicaris: putas, quod te non videam forni-
cantem, quem video adulterium cogitantem? Ex hoc itaq; te argu-
am & statuam contra faciem tuam: tu non vni attendere faciem
tuam, ego itaque faciem, ut agnoscas &c. Quod DEI opus nihil
aliud est, quàm ipsa contritio activa, qua animus peccatoris
percellitur, ad quam cohorteseit. Quemadmodum enim pec-*

catorum post tergum abjectio Esa. 38, 17. projectio in profundum maris Mich. 7, 19. exoptata est hominis peccata sua agnoscen-
tis & de iisdem dolentis consolatio : sic eorundem productio
& ante oculos securi peccatoris collocatio, severa est percussio
& contritio, utraque à DEO profecta, unde David Ps. 38, 5. *sa-*
gittarum infixionem, quæ ipsa contritio est, uni DEO tribuit,
sive dolores ex peccatorum agnitione ortos divinitus sibi im-
missos fatetur. Hiskias etiam ossa sua à DEO contrita esse ag-
noscit. Esa. 38, 13. Est *Spiritus sanctus*, qui mundum arguit de
peccato. Joh. 16, 8. qui in primis originalis peccati, ex quo ac-
tualia peccata nascuntur, sceleratam, gravitatem, atrocita-
tem, quam nemo hominum natura agnoscit, in lucem profert,
ob oculos ponit, ut, qui ritè eam intuentur, non possint non
totis animis contremiscere. DEUS itaque & solus quidem
contritionis pœnitentialis causa est, sine cujus operatione &
lumine nemo unquam ad veram peccatorum agnitionem, mi-
nus ad eorundem odium & detestationem perveniret.

Causa or-
ganica lex
est toto
suo com-
plexu.

28. *Causa organica sive instrumentalis*, per quam DEUS
hominum peccata conterit, *lex est*. Inde enim *peccati est agni-*
tio Rom. 3, 20. hæc *iram operatur* cap. 4, 15. absque hac *pecca-*
tum est mortuum cap. 7, 8. Legem autem dum dicimus, simul
omnia, quæ quocumq; modo legis officio funguntur, complectimur,
adeoque huc etiam pertinent varia in sacra & profana histo-
ria, quin & ipsa experientia severissimæ iræ divinæ & gravissi-
morum suppliciorum pœnarumque exempla, itemque inusita-
ta in cœlo, astris, aere, aquis prodigia, visû audituque horren-
da, quæ interdum impendentium maximarum calamitatum
sunt prænuncia. In primis etiam huc pertinet seria passionis
Christi per omnes partes meditatio : tamen enim eius confi-
deratio præcipuè sit Evangelica, in eaque fons omnis consola-
tionis situs sit, unde immensam DEI Patris erga nos homines
misericordiam & ardentissimum Filii amorem cognoscere li-
cet, unde efficacissima, ad vincendas peccati, satanæ, mortis,
infernî, tentationes, & invicta arma petuntur : simul tamen
etiam lucidissimum exhibet speculum, in quo iræ divinæ furor
& peccati atrocitas contemplanda proponuntur. Confer Ger-
hard. LL. CC, de pœnit. §. 70. & seqq. Hutter. LL. CC. p. 757.
Wigand.

Wigand. Syntagm. Vet. Test. p. 1148. & Nov. Test. p. 234. & 842. Eckard. dilucid. controvers. de pœnit. c. 4. p. 89. & seq. Non itaq, *Contritio maxime & proprie ad Evangelium pertinet, quæ tertia Propositio est Bellarmini lib. 2. de pœnit. cap. 2. pag. 410. & seq. quam adstruere conatur, sed impertinentissimè ex Ezech. 11, 19. & 36, 16. Vbi DEVS pollicetur Spiritum novum, & cor carneum, ex Christi ipsius & Apostolorum predicatione pœnitentia, à legi veteris & novæ naturæ & discrimine &c.* Dictum modo est, ex lege esse, & sola quidem, agnitionem peccati, quæ cum aut ipsa sit contritio, aut magna ejus pars, necesse est, ut eò etiam ipsa met referatur. Et notissimum est, in eò præcipuè versari discrimen inter Legem & Evangelium, quod hoc vivificet, erigat, consoletur, à quibus functionibus alienissimum est omne id, quod propriè contritioni competit: illa verò occidat, terreat conscientiam, infigat sagittas, percutiat corda &c. quæ omnia in contritione cū concurrant, satis abundè, quod legem causam habeant, testantur: plura de hoc argumenta habent Gerhard, LL. CC. de pœnit. §. 77. p. 805. & seqq. Eckard. dilucid. de pœnit. cap. 4. q. 2. pag. 99. & seqq. ubi etiam Bellarminianæ opinionis fundamenta omnia ordine evertuntur: adde & Hunn. tom. 1. oper. tractat. de Sacramentis Veter. & Nov. Test. pag. 1104. & seq. VVigand. in refutat. Schvvenckfeldissimi, inter quem & Papiſmum hac parte consensus est. pag. 261.

29. *Materia ex qua contritionis κατ' ἀναλογίαν dici possunt omnes illi, sive actus, sive παθήματα, quæ in eadem concurrunt qualia sunt (1.) vera peccatorum agnitio, ita ut ab originali initium fiat, ejusque atrocitas probè investigetur: tametsi enim horrendam ejus turpitudinem nemo hominum intelligere la- ris possit, ejusque plena cognitio solius sit DEI, qui occultum nostrum ponit in illuminatione vultus sui. Psal. 90. 8. Decet tamen quemvis pœnitentem quàm diligentissimè anniti, ut, prælucente verbo DEI, nihil omittat, quo ad immanis fœditatis ejus agnitionem provehi queat, quippe qua sine vera pœnitentia exerceri non potest, confer exemplum Davidis Psal. 51. 7. (2.) Ira divina sensus, qui ad præcedentem agnitionem ultrò sequitur: qui enim ineffabilem peccatorum originalis & actualium*

Nequaquã
verò Evan-
gelium.

Materia ex
qua κατ'
ἀναλογίαν
actus &
παθήματα
quæ in cō-
tritione
concurrūt.

atrocitatem secum ponderat, & vicissim puritatem & mundici-
em oculorum DEI, per quem malum videre & ferre non potest, Ha-
bacuc. 1. 13. considerat, facile percipit, quantopere ira ejus ex
peccatis accendatur. (3.) *Conscientia acerbissimi cruciatu*, quos
iræ divinæ sensus parit. Quicumque enim se & natura peccato
miserrimè corruptum, & quotidie peccata peccatis cumulare,
& inde consumentem DEI iram adversus se concitare, intra se
sentit, non potest non intimè cohorrescere, trepidare, angere,
expavescere. Unde mox nascitur 4. *vera humilitatio*, qua ho-
mo peccator, qui iram divinam & pœnas temporales atque æ-
ternas meruit, se ad pedes & tribunal DEI abjicit, seque judi-
cat indignum, qui erecto vultu aut sublatis sursum oculis in
conspectum DEI progrediatur. Cum isthac humiliatione con-
juncta est 5. *peccati ingenua confessio*, ut licet peccator non ne-
sciat, omnia peccata sua jam antè DEO esse manifestissima,
& longè quidem, quam ipsimet peccatori, manifestiora, si-
quidem DEus etiam profunda pectorum scrutetur, & occul-
tas cogitationes ac desideria cum lege pugnantiæ exactissime o-
mnia sciat, nihilominus tamen, quia sic divinus exigit ordo &
spes remissionis, cor suum ingenuè effundat, & peccata corde
agnita ore quoque confiteatur, & quidem 6. *cum extrema de-
testatione ac odio*, quod animo sincero conceptum, sincerè quo-
que in auribus DEI exprimat, seque tantopere jam peccata a-
versari atque execrari, quantopere pridem illis fuerit delecta-
tus, significet. Hæc sunt, quæ contritio pœnitentialis com-
plectitur, ut ex eorum exemplis, quos verè contritos olim fuisse
scriptura testis est, liquet: & hinc suo modo contritionis ma-
teria dici possunt.

Forma,
quæ confi-
sit non in
Actione li-
berè assu-
ta.

30. *Forma in ipsa secretiori cordis compunctione*, quæ ex pec-
catorum agnitione & metu iræ divinæ pœnarumque nascitur,
consistit, Rectè VVigand syntagm. Vet. Test. pag. 1154. ad quæ-
stionem: *quæ forma contritionis? formam*, inquit *Contritionis esse*
inducant Propheta, veram agnitionem, pavorem & terrores consci-
entia, sensum ira DEI & pœnarum ob admissa peccata &c. Confer
syntagm. Nov. Test. pag. 233. & 841. Passio itaq; formaliter est
hominis peccatoris pœnitentialis contritio & nequaquam actio,
quod tamen Pontificii plerique omnes mordicus defendere ni-
tuntur

tuntur. Nota sunt Bellarmini verba lib. 2. de pœnit. c. 2. *Contritio non est passio, sed actio, eaq; libera non coacta.* Et ante Bellarmin. definitiones, quibus Scholastici contritionem explicarunt: *Contritio est deestatio seu dissolventia peccatorum à se commissorum liberè elicità à voluntate ad placandum divinam offensam*: item *Contritio est dolor pro peccato voluntariè assumtus cum proposito confitendi & satisfaciendi*: ubi, quia objici posset si contritio dolor sit, jam non esse actionem, respondent: *licet pœnitentia interior, quæ principaliter accipitur, pro contritione dicitur dolor de peccatis commissis, tamen ibi dolor non accipitur pro passione, sed pro actu*: unde dupliciter dicitur dolor: uno modo dissensus voluntatis ab ipso peccato: alio modo passio resultans in dissensiente ex illo dissensu: dissensus autem iste est de essentia contritionis: passio autem est effectus illius &c. confer Lexic. Altenstaigii auctò à Johanne Tyt sub titulo *Contritio* pag. 200. & seq. Ergo Pontificii ferè omnes formam contritionis in actione constituunt, nec aliter possunt, quamdiu eam meritoriam esse docent: quia mereri est agere, & omne quod mereri debet, oportet ut virtutis, quæ habitus electivus est, actus sit. Confer Thomæ Aquin. Supplem. quæst. 1. artic. 2. pag. 3. ubi tamen subjicit: *quampvis contritio, quæ propriè significatur hoc nomine, non sit virtutis actus, tamen quæ metaphoricè hac voce significatur (quia voluntatis rectitudinem denotat) actus est virtutis.*

31. Verùm contritionem in pœnitentia non esse actionem aut actum liberum, ab orthodoxis hactenus argumentis, & numero multis, & pondere gravibus ostensum est, desumptis, ab ipsa nominis explicatione & germana significatione: Est omnis contritio in subiecto, quod conteritur, tam certè passio, quàm certum est, agere eum, qui conterit, ut contradictionem manifestam implicet dicere id quod conteritur, dum conteritur aut contritionem per impressionem recipit, agere. Ab aliis nominibus, quibus scriptura passim contritionem describit, quæ supra §. 26. allata: ut cum dicitur *percusio cordis*, *conturbatio osium*, *sagittarum infixio*, *compunctio* &c. *Natura & definitio passionis. Pati est quoddam recipere*, communis est Scholasticorum vox, vide Lexic. Altenstaig. pag. 652. *Passio ergo est actionis receptio*: quod etiam speciatim de contritione verum, quippe in qua

Sed passio-
ne.

in qua DEUS per legem in cor hominis operatur : hoc verò actionem ejus cum tremore & timore recipit. Plura argumenta his. non addimus, quæ legere licet apud Chemnitz in exam. Concil. Trid. pag. 381. Menzer, in Exeg. Aug. Conf. pag. 562. Gerhard, LL. CC. de pœnitent. §. 76. & in Confess. Cathol. lib. 2. special. part. 3. artic. 16. cap. 3. pag. 24. seqq. Meisn. Phil. Sobr. part. 2. pag. 486 & seqq. Eckard. dilucid. de pœnit. cap. 4. q. 7. pag. 91. & seqq. VVigand. Synt. V. T. pag. 1148. N. Test. pag. 234. Unde etiam ex ipsis Pontificiis haud pauci rei ipsius perspicuitate convicti non possunt negare, contritionem esse dolorem per essentiam, esse contusionem & angorem ob patrata scelera: quorum verba vide apud D. Gerhard. in confession. Cathol. lib. & cap. cit. pag. 26. Distinguunt quidem ut §. præced. notavimus, inter dolorem sumtum pro dissensu ac displicentia voluntatis, & pro passione resultante in partem sentientem ex illo dissensu: ac priorem dolorem esse formam, posteriorem verò effectum contritionis ajunt. Sed falsum est. postulatum, contritionem formaliter consistere in nuda displicentia, cum potius angor sit & pavor mentis ob peccata commissa, qui quidem includit displicentiam, sed non est ipsamet displicentia. Rursus falsum est postulatum, aliquem dolorem esse actum, cum id contradictionem in adjecto habeat, neq; unquam concipi animo possit, quomodo id, quod formaliter dolor est, simul per essentiam actus sit, confer D. Gerhard. loc. cit. ex quo hic annectimus, quod non negemus, si omnia, quæ in contritione concurrunt & §. 29. præced. enumerata sunt, sigillatim consideremus, quædam actus habere rationem, qualia sunt peccati recordatio & agnitio, iræ DEI consideratio, peccatorum detestatio: at in hisce sola contritionis nequaquam consistit, sed tantum in timore vindictæ & futuri judicii, in conscientia legis aculeo vulnerata, in horrore, dolore, morsu, compunctione &c.

Quid de
attritio-
ne pontifi-
cia senti-
endum.

32. Non omnino sicco pede hic prætereunda Pontificiorum distinctio inter contritionem & attritionem, de qua Altenstaig. loc. §. 30. cit. ex scholasticis posteaquam contritionem definivit displicentiam peccatorum liberè elicitam à voluntate hæc addit. Displacencia peccatorum est duplex, quædam perfecta & sufficiens, ad dimissionem peccati scil. quæ est de omnibus peccatis commissis

missis & debite circumstantionata, praesertim circumstantia finis: alia est imperfecta non sufficiens ex parte penitentis ad remissionem peccatorum, vel propter obiectum, quia non est de omnibus peccatis, vel quia ordinatur in finem inhonestum, & tunc vocatur attritio, quasi tritio imperfecta, vel tritio in partes majores: perfecta, verò displicentia dicitur contritio, quasi tritio omnium simul in partes minutissimas, quod sit, quando est de omnibus peccatis & secundum omnes circumstantias requisitas ad peccatorum remissionem &c. Plura vide apud Becanum de sacramentis in specie cap. 35. tom. 1. pag. 848. & seqq. Dn. Chemnitius in exam. Concil. Trid. de contritione pag. 382. paucis dogmatibus hujus de attritione summam comprehendit. Docent, inquit, Scholastica disputationes liberum arbitrium naturalibus suis viribus ex solo dictamine legis naturae sine operatione Spiritus Sancti posse inchoare, concipere & assumere verum dolorem & detestationem peccatorum, hoc est attritionem, & illam esse dispositionem ad gratiam: quam dispositionem vocant facere, quod in se est, quod sit meritum congrui. Hoc dogma de attritione merito rejecit Lutherus & post eum omnes orthodoxi in hunc usque diem, eo quod viribus naturae corruptae tribuat, quod singulare DEI donum est, adeoque oppugnet ipsius Christi aphorismum: Mala arbor non potest bonos fructus facere, quod hominem faciat hypocritam & magis peccatorem, quod insuper fabricet periculosissimos conscientiarum laqueos &c. de quibus omnibus videndus D. Chemnit. loc. cit. ubi singula uberius persequitur atque illustrat: confer etiam Zeemann. ferner offenbahrung des vncathol. Pabst. tom. 2. p. 319. & seqq. Eckard. de poenit. cap. 4. quaest. 7. pag. 130.

33. Fines contritionis diversi sunt. Gloria DEI hic quoque Finis DEI locum supremum habet, quique quo omnia, ordini divino gloria, convenientia, spectant. Confer. Psal 51. 6. Dan. 9. 7. Alter est, ut DEO debita exhibeatur obedientia. Paratus est DEUS ex summa misericordia, propter Filii sui meritum, peccata remittere, sed certo ordine, cui etiam inclusa est peccatorum agnitio & se Obdientius de iis dolor: non enim nisi in vas contritum oleum suae gratiae debite constitit infundere, cujus non capaces sunt, quorum praefra exhibitio. Eta, dura, secuta sunt pectora: quo de ipse Jehova Jerem. 3. 13. non irascar in perpetuum, sed tu agnosce peccata tua &c. Joel. 2. 13. se indite

F

corda

Perfugium
ad divinā
misericor-
diam.

corda vestra, plorent sacerdotes Domini &c. Tertius, ut agnita ex-
trema miseria nostra, & quod ex eadem nullæ in nobis emergendi
vires, vera in Christum mediatorem fide ad solam DEI miseri-
cordiam confugiamus, eundemque unicum solatii & salutis
nostræ asylum nobis constituamus, ad exemplum Davidis Psal.
51, 3. *miserere mei DEus secundum magnam misericordiam tuam
& secundum multitudinem miserationum tuarum dele iniquita-
tem meam.* Confer Dan. 9, 18. Quartus, ut quanta sit promissi-
onum Evangelicarum & beneficiorum Christi merito pariorum dul-
cedo, re ipsa experiamur. Dulcissimus est potus homini siti ex-
hausto, gratissimus cibus fame pene enecto, jucundissimum o-
leum, quo artuum dolores & cruciatus mitigantur: sic exopta-
tissimum contrito & ex peccatis atque ira DEI perterrefacto
pectori est nuncium Evangelicum, suavissima Christi beneficia
fidei oblata & ab eo percepta Psalm. 51, 10. *Auditui meo dabis
gaudium & letitiam, & exultabunt ossa humiliata.* Confer Wi-
gand. Synt. V. T. pag. 1155. & seqq. ubi addit: *sensum legis di-
vinæ in ipsa praxi, ut, quæ ejus sit vis, rectius intelligamus, item-
que excitationem odij adversus peccata, ut ab iisdem abhorre-
re discamus.*

Perceptio
dulcedinis
Evangelii-
carum pro-
missionum
&c.

Nequaquā
verò remis-
sio pecca-
torum &
justificatio

34. Pontificii hisce finibus quos sacra scriptura & dictis &
exemplis tradit, non contenti, longius progrediuntur, & ipsam
remissionem peccatorum ac justificationem peccatoris contritio-
nis finem, quantum in se, faciunt. Altenstaig. in Lexic. pag.
201. ex Scholasticorum sententia, posteaquam tres pœnitentiæ
partes ab illis receptas, contritionem cordis, confessionem oris, sa-
tisfactionem operis enumeravit, de contritione hæc annectit:
*Principalior pars pœnitentiæ est contritio, nam per eam principalior
sequitur finis pœnitentiæ scilicet peccatorum remissio: ad cordis e-
nim contritionem sequitur remissio peccatorum etiam sine aliis,
& ita sola in actu sufficit. Et mox: ad deletionem peccati sola cri-
minis derestatio debite circumstantionata sufficit: confer etiam
præcedentia & adde Bellarm. lib. 2. de pœnit. c. 12. pag. 422.
ubi quæ ab antiquis Ecclesiæ Doctoribus securius atque incau-
tius dicta sunt, scil. per contritionem peccata deleri, ablui, purga-
ri, eadem Deum placari eiq; satisfieri, ipsam meritum ac pretiū esse,
lacrymas veniam non postulare, sed mereri &c. cupidissimè ample-
ctitur*

datur & sua facit, ut evincat, *contritionem esse causam remissionis peccatorum*. At quid hoc est aliud, quam totam Evangelij doctrinam de misericordia æterni Patris, de Filii Christi merito, satisfactione ac toto redemptionis opere, de gratuita peccatorum remissione, de veræ fidei natura & operatione, adeoque simul veræ consolationis fundamenta convellere, ac afflictis conscientis de gratiæ & salutis certitudine dubitandi materiam subministrare, imò desperationi viam sternere. Est *sola æterni Patris misericordia*, fons & origo remissionis peccatorum & justificationis nostræ Rom. 3, 24. *solus Christus* sui contritione, doloribus & passionibus suis nobis remissionem peccatorum & justificationem promeruit. Esa. 53, 5. 1. Tim. 2, 6. Est *sola fides* instrumentum, quo DEI Patris gratia & Christi beneficia ad obtinendam remissionem peccatorum & justificationem apprehenduntur. Nullus hinc contritioni, tanquam causæ, aut medio, quo DEO satisfiat, locus est. *Non lex*, ex qua contritio oritur, sed *solum Evangelium* viam consequendæ remissionis peccatorum & justitiæ monstrat. Et quemadmodum dolor licet ingens & acerbus, qui ex inflicto corpori vulnere percipitur, nequaquam dici potest sanationis causa: sic quoque interior dolor, qui ex peccatis & mentis conscientiaq; vulneribus nascitur, spiritualis sanationis & justificationis causa non est. Habet locum suum contritio in via & ordine, qui cuius remissionem peccatorum & justificationem querenti tenendus est, sed non illico causa est: confer in hanc rem plura apud Hunn. tom. 1. oper. pag. 1003. D. Zezm. in der fernern offenhaltung des Bncatholischen Pabstthums. tom. 2. pag. 325. & seqq. Gerh. LL. CC. de pœnit. §. 85. Confess. Cathol. lib. 2. part. 3. artic. 16. cap. 3. pag. 27. Eckard. de pœnit. pag. 114. seqq.

35. *Effectus contritionis* varius omnium optime ex exemplis contritorum apparet: quippe è quibus prodeunt 1. *acerbi gemitus & suspiria*. Peccatum enim cum serid agnoscitur, cum ira divina sentitur animo, non potest non ingemiscere secum homo & assidua trahere suspiria: quo de pœnitentiales Davidis Psalmi luculenta testimonia exhibent. Psal. 6, 7. *laboravi in gemitu meo* &c: Psal. 38, 9. *rugiebam à gemitu cordis*, confer. Psal. 102, 6. & 21. & preces Hiskia Esa: 38, 14. *gemebam ut columba*.

Effectus
Acerbi gemitus.

Ploratus &
lacrymæ.

2. *Ploratus & lacryma*, quas post auditam gravem concionem pœnitentialem largiter profuderunt Israëlita, ut & locus ipse iisdem irrigatus nomē inde sortitus & *Bochim* dictus sit Jud. 2. 5. & iterum David Psal. 6. 7. *lavabo per singulas noctes lectum meum, lacrymis stratum meum rigabo.* Confer historiam mulieris peccatricis, quæ Christi pedes lacrymis suis rigavit, Luc. 7. 38. Petri, qui ex trina Christi magistri sui abnegatione *amarè flevit.*

Detestatio
peccati.

Matth. 26. 75. 3. *Detestatio peccati*: fieri enim nequit, quin ad ingentes animi cruciatus & dolores intimos, quorum omnium causa & origo est commissum peccatum, extrema ejus detestatio sequatur: quod pertinet vaticinium & divina prædictio pœnitentiæ populi Israëlitici Levit. 26. 41. tunc *orabunt pro impietatibus suis*, aut rectius juxta Hebræum: *acquiescent in pœna iniquitatis sue*: id est, digna se peccatis suis pati fatebuntur, portabunt patienter iram Domini, non improbabitur ullo modo judicia divina: dicent uno ore: *recessimus & non audivimus vocem Domini, ideo stillavit super nos maledictio, quæ scripta est in libro Moysi: Iustus est Dominus Deus noster in omnibus operibus suis, quæ fecit.* Dan. 9. 9. & seqq. ac mox conversi ad peccata sua, quibus tantas sibi attraxerunt calamitates, interiores conscientia morfus & vulnera, nec non externas plagas & afflictiones, eadem detestabuntur & execrabuntur: confer notam marginalem Lutheri ad loc. cit. & ejusdem paraphrasin, in qua hæc quoque verba habet: *Das sind Wort einer ernsten Reu/da sich einer selbst im hertzengrund hasset vnd anspehet: saget/psui dich/was hab ich gerhan/danck hab du versuchte Sünde &c.* Cum hac peccati detestatione conjuncta semper est 4.

Seria humilitatio.

Seria humilitatio, qua se homo pectore contritus ad pedes DEI abjicit, in pulvere sedet, nullo se beneficio dignum æstimat: quo pacto David, ægotante filiolo ex adulterio suscepto, sese humiliavit & *super terram jacuit.* 2. Sam. 12. 16. itemque Hiskias, cum prius cor ejus fuisset exaltatum 2. Chronic. 32. 26. & Manasses, 2. Chron. 33. 12. & seqq. confer. parabolam de publicano Luc. 18. 13. Tandem 5. *etiam virium corporis debilitatio & prostratio ex contritione oritur.* Quemadmodum enim quævis animi ægritudo & tristitia corporis vigorem facile frangit & imminuit: ita vel maximè dolor ille, qui ex seria peccati &

iræ

iræ DEI agnitione nascitur, unde David Psal. 6, 8. *turbatus est a furore oculus meus, inveteravi inter omnes inimicos meos* Psal. 32, 3. *inveteraverunt ossa mea* v. 4. *Conversus sum in arumna mea dum configitur spina.* Confer Psalm. 38, 4. & seqq. 102, 4. & seqq. & Wigand, synt. V. T. p. 1156. & seqq. N. T. p. 235. & 843.

36. De objecto contritionis, (quod omnia peccata, originale ^{Objectum} & actuale disp. præc. §. 41. esse diximus) Scholastici pro more ^{peccata.} curiosè superstitioneque ac parum ad fidei analogiam, quam exempla verè pœnitentium confirmant, disputant. Antesignanus eorum Thomas Aquinas in posth. supplem. part. 3. quæst. 2. sex de eo articulos, sive quæstiones movet, quas omnes hoc ^{Etiam peccatum ori-} loco sub examen vocare, longum nimis foret. Præcipua est ^{ginale.} & nullo modo hîc prætereunda, quam secundo loco ponit: *an contritio etiam debeat esse de peccato originali?* ad quam his respondet verbis: *Contritio cum sit dolor voluntatis duritiem ex peccato contractam quodammodo comminuens, non propriè est de peccato originali, quod non nostra voluntate est inductum, sed potius natura corruptæ origine est contractum, potest tamen de eo aliqua esse displicentia.* Idem alii sentiunt & expressè, contritio, inquit, est de solo peccato actuali & de peccato proprio & peccato præterito, confer Altenstaig. Lex. pag. 201. & Gregor. de Valent. tom. 4. disp. 7. q. 1. punct. 2. pag. 1546. & seqq. Sed ex falsis hypothesebus, quas in articulo de peccato originali amplectuntur, talia originem habent. Tradunt enim peccatum originis abusive peccatum dici, non tam esse offensam, quam maculam, imò pœnam potius, quam culpam, non habere rationem peccati, nisi cum respectu ad peccatum, quod Adam commisit, aut si sit peccatum, minus tamen esse quovis minimo peccato veniali, quod quidem possit dici objectum contritionis, sed non nisi remotè. His stantibus, mirum non est, eos nullam propter originale peccatum contritionem esse necessariam statuere. Verùm aliter longè scriptura sacra de originali peccato loquitur, quod esse ait intimam, pessimam, profundissimam, & instar cujusdam abyssi inscrutabilem atq; ineffabilem totius naturæ & omnium ejus virium, in primis superiorum & principalium anima facultatum mentis & voluntatis corruptionem, qua hominem reddat ira DEI & pœnarum temporalium æternarumq; reum. De quo antehac disp. de peccato originali latius actum. Ex quo sequitur, non tantum

homini pœnitenti necessarium esse, ut de hoc peccato, cuius
 fœditas nunquam satis agnosci mente aut describi verbis po-
 test, seridò doleat & conteratur, sed & ex hoc ipso primam tristi-
 tiæ & doloris hauriat materiam : id quod Davidē, quem DEus
 omnium verè pœnitentium quoddam quasi speculum esse vo-
 luit, fecisse Psalm. 51. legimus : in quo vehementer quidem a-
 nimoque perculsus est ex horrenda facie peccatorum actuali-
 um, homicidii & adulterii, sed maiorem sentit contritionem,
 quando in eorum descendit originem, & se suamque naturam
 ex ipsa prima conceptione miserrimè vitiata, ipsam primam
 guttam sanguinis materni, ipsum semen, ex quo in utero ma-
 tris fuerit formatus, fœdissime pollutum atque inde se domici-
 lium, in quo omnium peccatorum colluvies habitaret, factum
 esse, tristis secum considerat. Confer præc. §. 29. sub init. Huc
 etiam referenda Apostoli Pauli *ταλαιπωρία*, quam Rom. 7, 24.
 ex pravæ concupiscentiæ adeoque peccati originalis furiosis &
 rebellibus motibus pectore percipiens graviter & lamentabili
 voce conqueritur, inde fieri ut *bonū, quod ex regenerationis bene-
 ficio velit, non faciat, contra faciat malum, quod oderit* : quod *de-
 lectetur lege DEI secundum interiorem hominem, sed videat aliam
 legem in membris suis repugnantem legi mentis suæ* &c. quæ *ταλαι-
 πωρία* cordis contritionem complectitur, imò ipsa est contritio
 atque intusus animi dolor. Ergo ut peccata omnia, excepto
 nullo, sunt objectum contritionis pœnitentialis, siquidem
 quovis peccato in se spectato Deus offenditur, atque ira ejus
 concitatur : sic quoque & vel maximè quidem originale, ita ut,
 qui contrarium statuunt, seria veræ pœnitentiæ exercitia im-
 pediant, & ipso opere in hypocrisin homines seducant.

Subjectum
 quod &
 quo

37. *Subjectum* idem est, quod & ipsius pœnitentiæ scilicet *to-
 tus homo*, fide *subjecto* quod quærat : cor autem hominis, id est,
 omnes animæ vires, mens, voluntas, appetitus, affectus, est *sub-
 jectum quo*. *Mens* enim horrenda peccatorum monstra intuetur
 & agnoscit : *Voluntas* ad ea sic agnita exhorrescit, eademq; dete-
 statur ac odit : reliquæ etiam vires ac potentiæ dolore & tristitia
 afficiuntur : quin imò licet contritio in his animæ viribus præ-
 cipuè vim suam exerceat, non tamen corpus ejusque membra
 omnino ab ea libera manent, sed ex arctissima cum anima con-
 junctione

junctione in societatem doloris trahuntur: id quod ex exemplorum intuitu satis est conspicuum, confer Davidem & ejus Psalm. 6, 4. 7. 8. Psalm. 32, 3. seq. Psalm. 38, 4. & seqq. Hiskiam, mulierem peccatricem, publicanum, Petrum &c.

38. Ad Contritionis adjuncta refertur 1. *Quantitas*, de qua Adjuncta inter Pontificios veteres & hodiernos non eadem est sententia. confer Gregor. de Valent. tom. 4. disp. 7. q. 8. punct. 5. pag. 1724. & seqq. Becan. de sacramentis in specie cap. 35. q. 2. p. 849. seq. tom. 1. operum. Hodierni ferè omnes docent, *Quantitas* non requiri tantam contritionem, quæ sit summa intensivè, nec quæ habeat certam intentionem soli DEO cognitam, sed satis esse, ut sit summus de peccato dolor appetitivè, quod fiat, quando quis ita peccatum detestatur, ut mallet illo carere, quàm alio quovis malo, saltem in genere de malis aliis omnibus cogitando. Debere enim oriri contritionem ex motivo charitatis DEI super omnia, unde sicut amor DEI super omnia non debeat esse necessario summus intensive, sed tantum appetitivè, quia scilicet præferat DEum creaturæ: sic etiam servata proportionem de contritione sit judicandum. Vide Bellarm. lib. 2. de pœnit. cap. 10. & 11. qui rem totam sex declarare nititur propositionibus, quarum ultima est. *Utilissimum* est, peccata singula amarissime & longo tempore deslere, ut contritio non solum appetitivè, sed etiam intensivè & extensivè summa dici possit. Ortum hujusmodi nullius pretii, sed potius intensivè & extensivè periculosus ac superstitiosis quæstionibus falsa præbet hypothesis, de qua paulò ante §. 34. per contritionem deleri, ablui & purgari peccata, DEum placari eidemq; satisfieri &c. Inde enim in has de magnitudine contritionis disputationes progressi sunt, & tradiderunt, non quamvis contritionem talia efficere posse, sed eam demum veram sufficientem ac salutarem esse, quando doloris acerbitas magnitudinem scelerum & peccato conceptam voluptatem æquet. Scripturam sacram si hic quoq; ceu par est, consulamus, seriam illa quidem contritionem, quæ corda scindantur & compungantur, ab omnibus pœnitentibus exigit, gradus autem doloris ac tristitiæ nullos præscribit: ad deslenda peccata hortantur Prophetæ, Christus Apostoli: nusquam autem certam lacrymarum fundendarum mensuram constituunt. Et si exempla pœnitentiæ hætenus

comme-

commemorata inspiciamus, Davidis, Manass. Mulieris peccatoris, Acolasti, Petri, Pauli, id quidem omnes egerunt, ut se verè serioque de commissis peccatis dolere, angere, contristari testentur, at quod de quantitate contritionis tali, qua doloris magnitudo aut cum voluptate pridem est peccatis concepta, aut cum peccati magnitudine conferenda, solliciti fuerint, nullum invenimus vestigium, confer Gerh. LL. CC. de pœnit. §. 83. & 84. Eckard. de pœnit. cap. 4. quæst. 6. pag. 127. & seqq.

Locus &
tempus.

39. De Loco & tempore, quibus ob peccata dolendum, adeoque contritio necessaria est, repetenda quæ præc. disp. de pœnitentia in genere §. 43. dicta sunt: Eadem enim hîc totius & partis ratio est. Pontificii hic quoque suis speculationibus indulgent, ac imprimis de tempore, quo contritio necessaria sit, variè disputant. Ajunt: neminem teneri ex præcepto contritionis, statim atque peccavit contriri: neminem obstrictum esse, ut de peccato semel remisso quando id memoriæ occurrit, doleat & conteratur. &c. Vide Gregor. de Valent. tom. 4. disp. 7. quæst. 8. de contritione punct. 4. pag. 1703. & seqq. Non ita sacræ literæ loquuntur, non exempla verè pœnitentium docent. Certè mandata de agenda pœnitentia, adeoque etiam de contritione, à Prophetis, Christo, Apostolis toties inculcata, universalia sunt etiam respectu temporis, ut, quo momento quis in peccatum labitur, eodem de lapsu doleat & resurgat: quod etiam merito refertur salutare Siracidis monitum cap. 5, 8. *non tardes converti ad Dominum & ne differas.* Ad quem locum rectè Jesuita Cornel. à Lap. pag. 147. *Quis enim lethiferam viperam manu ferat & non statim excutiat? quis pestem in corpore alat? quis hostem capitalem intra mœnia ferat? quis demonem in mente gesserit?* Subjungit ibidem admonitionem Basilii: *Quando te peccatis obnoxium senseris, ad pœnitentiam citò converti ne confundaris.* Confer etiam Chrysost. in epist. 2. ad Corinth. homil. 22. ubi locus Sirac. allegatus graviter illustratur, itemque Augustin. lib. 6. confess. cap. 11. & lib. 8. cap. 5. Quod Gregorius de Valentia tom. cit. pag. 1708. ait, *Exhortationes ad citam contritionem esse consilia, non mandata, intolerabile postulatum est, quod verborum claritas sufficienter retundit: Ejusdem commatis altera quoque est propositio de peccato semel remisso necesse non esse, ut qui denuò doleat & conteratur.*

An statim
de commissis
peccato dolen-
dum?

teratur. Ubi primum notamus, dum certitudinem remissi pec-
cati præsupponunt, quod sibi metipsis adversentur & dogma
suum evertant, quod de obtenta peccatorum venia semper dubitã
dum sit (verba sunt Oliverii Bonartii Jesuitæ in cap. 5. Ecclesiast.
p. 78. & 79.) quia nemo certus sit, an pœnitentia fuerit sufficiens ad
peccati deletionem, an profecta ab auxilio gratiæ prævenienti, an etiã,
tum mere naturalis, an absolutum fuerit abstinendi in posterum à
peccatis propositum, an ratio pœnitendi processerit ex DEI supra omnia
dilecti amore & peccati detestatione, an verò ex metu mali alicujus
temporalis &c. Deinde quod ipsam spectat assertionem, nõ requiri con-
tritionem de peccato semel remisso, reclamant illi seriò pœniten-
tium iterati gemitus, suspiria, dolor subinde rediens, lamenta-
biles gestus vocesque. Remissa sibi fuisse homicidium & adul-
terium, ea hora scivit David, quando ex Nathane audivit: Do-
minus abstulit peccatum tuum, non morieris 2. Sam. 12, 13. & ni-
hilominus multas postea fudit lacrymas noctu interdumque, de
quibus Psalmi pœnitentiales testantur. Sic etiam de peccatis
juventutis, quorum se habere remissionem non ignoravit, vehe-
menter doluit Psal. 25, 7. Intellexit enim, divinam esse volun-
tatem, ut pœnitentiæ exercitia sine intermissione continuen-
tur, ut præterita etiam & remissa peccata sæpius defleantur,
quò eorum turpitudine semper in mente versetur, divina cele-
bretur gratia, & cautius in postetum vivatur. Peccatorum odi-
um, ipse Jesuita Cornel. à Lap. inquit, nempe tam turpis rei, si
verum est odium, hoc quoque requirit, ut ea etiam condonata nos ta-
men ultro vindicemus: ita Petrus peccatum negationis Christi, li-
cet sibi remissum, tota vita flevit, & quotidie ad gallisinium ejus
memor ubertim lacrymatus est, &c.

An etiam
 dolendum
 de peccato
 jam remis-
 so?

40. Cognationem habent cum contritione, quemadmodum Cognata.
 illa, quæ præc. disp. §. 44. pœnitentiæ affinia esse diximus: sic
 quoque eorum nonnulla, quæ supra §. 29. ad materiam retuli-
 mus, ubi contritionis nomen in ampliori significatione usur-
 patum, ut eo non tantum essentialia, qualia sunt vera peccati
 agnitio, iræ divinæ sensus, & conscientiæ cruciatus ac morsus
 comprehendantur, sed etiam quæ iis adherent, quæ antecedunt
 aut sequuntur: quo pertinet humillima ad tribunal DEI abje-
 ctio, peccati detestatio &c. Sic ad cognata etiam refertur suo
 modo

G

modo possunt quidam effectus §. 35. enumerati, scil. gemitus, lacrymæ, &c. Præcipue tamen *peccatorum confessio*, qua homo post vitæ suæ & actionum diligentem ad normam legis moralis explorationem infinitis modis se mandata divina violasse agnoscens, liberè ingenuèque, non sine animi dolore, vel coram solo DEO vel simul etiam coram Ecclesiæ ministro se peccasse fatetur, & absolutionem à peccatis petit: de qua verò, quia tum ob dignitatem suam atque utilitatem, tum etiam ob varias corruptelas, quibus obnoxia est, accuratorem meretur meditationem, peculiari disputatione agere, cum bono DEO constitutum habemus.

Pugnancia

41. Qui sanam de pœnitentia contritione doctrinam oppugnant, præcipui sunt PONTIFICII, ut ex hæcenus allatis constat. Per omnia enim ferè causarum genera & alias circumstantias, errores benè multos & graves, olim ex superstitione introductos, mordicus hodieque tenent & tuentur. Est illis contritio opus, *vi liberi arbitrii elicitum*, & dolor voluntariè assumptus, ajunt, propriè & maxime ad Evangelium eam pertinere, non passionem esse, sed actionem sive virtutis actum, finem & effectum eius esse remissionem peccatorum & justificationem, vim esse tantam, ut peccata deleat, & eorum omnium veniam à DEO impetret. Confer supra §. 28. & seqq. & adde Heshus, sexcent. error. cap. de contritione pag. 56. & seqq. è Calvinianis Bucanus LL. CC. loc. 30. de pœnit. quæst. 3. pag. 291. & seq. duplicem habet contritionem: alteram legalem, ex legis prædicatione, qua peccator peccati cautèrio vulneratus & terrore iræ DEI attritus, in ea perturbatione constrictus hæret, ex qua se explicare non potest: alteram Evangelicam, qua peccator graviter quidem apud se afflictus, alius tamen assurgit & ex Evangelii prædicatione Christum, vulneris sui medicinam, terroris consolationem, miseria portum apprehendit: ubi distinctas pœnitentiæ partes contritionem & fidem, earumque causas & operationes mirè confundit. Quod enim peccator graviter afflictus & perterrefactus ad Christum medicum & consolatorem se recipit, non est ex contritione, sed ex fide, quæ sola in Evangelicas promissiones fertur, & in iis Christum, eiusq; beneficia amplectitur. Confer D. Mentz. exegel. Aug. Confess. Loc. de pœnit. pag. 576. Antinomi in legem divinam extremè blasphemii non ex eadem, sed ex Evangelio immediatè magnitudinem

dinem offensa & deformitatem peccati ostendi & agnosci tradunt,
contra manifesta Apostoli verba, peccatum non cognovi nisi per
legem. Rom. 7. 7. Vide Schlüsselburg. Catalog. Hæreticorum
lib. 2. quæst. de Antinomis pag. 37. & seqq.

42. Definitio Contritionis ex iis, quæ ordine allata sunt,
talis nascitur. Contritio est verus & serius à DEO trinuno per præ-
dicationem Legis in corde peccatoris excitatus dolor, per quem pec-
catorum suorum originalis & actualium atrocitatem & gravitatem
secum agnoscens, atque inde iram DEI & promeritas pœnas metu-
ens, vehementer expavescit, contristatur & compungitur, idè im-
missus, ut DEO eiusq; iustitiæ suæ constet gloria, & miser homo hac
occasione ad opem, auxilium, misericordiam, solatium alibi scil. in
Evangelio & Christo mediatore quærenda compellatur.

Θεὸν μόνον δόξα.

Ad Eximium Dn. Respondentem.

BIs, memini, pridem te conscendisse cathedram,
Doctè & de rebus differuisse sacris.
Res benè successit. Labor hic est tertius: opto
Hunc quoque fortunet, terque quaterque, DEUS.

Amici affectus ergo scrib.

Præses.

Eximio Dn. Respondenti.

TEr cathedra nostræ te sistis gnave GEROLDE,
Terque ignava fugit cathedram lucemque serenam
Turba, suis Musis quæ cantat & ardua spernit.
Ter tibi, ter studiis benedicat ab axe Triunus.

F.

Ioh. Conradus Danhawver D.

JAm disputanti tertium, grator Tibi,
Gerolde doctè, tertium.
Par est tuam mactare diligentiam,
Tot gratulationibus.

G 2

Par

Par est tuam juvare diligentiam
Tot comprecationibus.
Certabis ergò diligentia meis
Cum gratulationibus?
Certabis & cum comprecationibus?
Fac. & juvet Ter optimus!
Non nostra deerit gratulatio Tibi,
Non nostra comprecatio.

f. gratulab.

Sebastianus Schmidt, SS. Th. D.
P. P. & Ecclesiastes.

Ad praestantissimum Dn. Respondentem.
NE doleat Sapiens, Stoica insipientia lingua
Decernit, mentem dum dolor acer habet.
Vt doleat sapiens, dicat Sapientia caelo
Missa, & letitia hinc munera vera docet.
Qui doluit benè, gaudebit benè. Summa bonorum,
Gaudium ab ingenti grande dolore venit.

amicitiæ causa scr.

J. H. BOECLERUS.

IAm Te saepe cohors vidit Studiosa Cathedram
Scandere, saepe Tibi vota GEROLDE dedit,
Doctrinam mirata tuam, mirataque flores
Quos velut ingenii nunc Tibi vernat ager.
Perge, DEUS flori dicat feliciter! olim
Fructibus & largà Te quoque melle beet.

*M. Iacobus Philippus Eschich, Arg. Vir-
denheimensis & Quatsenheimensis
Ecclesiarum Pastor.*

VTlex accusat, terret, mortemq; minatur;
Sic promissa DEI nostro dant gaudia cordi.
Dum veniam gratis spondent vitamq; perennem
Credienti: atq; ex his oritur metanxa salubris.

Quam

Quam cum describas clarè, sententia vera
Vt pateat, doceas & quæ sit opinio falsa;
Felix es, cordi si sic inscribis, Amice,
Adspirante DEO, doctrinam de METANOEA,
Consonet ut semper dictis tua vita. Secundet
Capta DEVS, letos successus, atq; laboris
Optatum fructum donet, fructumq; coronet.

M. Joh. Frideric. von der Straaß / Past.
zu Ober- und Mittel-Hausbergen.

Sunt, quos delectat, multas percurrere gentes,
Sunt, quos delectat sectari præmia Martis;
Sunt, quos delectat, diffundi munere Bachi;
Sunt, quos delectat, vernaes carpere flores.
Te GEROLD, crebrò Musarum castra subire,
Ut Cathedræ resonent, falsum dum dogma refutas;
Est divinus amor, GEROLD, est sancta voluptas,
Te sanctos, sacræ Sophiæ lustrasse recessus;
Nec non Aonidum toties intrasse palæstram;
Et Te divinis, vivisque rigarier undis;
Indolis egregios flores Te prodere vere.
Gratulor ergo vovens: Faxit DEUS Unus & idem
Trinus, quò, ter jam, conscendens pulpita sancta,
Præside sub tanto, sis terq; quaterque beatus!

M. Ioh. Iacob. Schnitzler / Argente.
p. r. Ecclesia Orthodoxa Osthusi
Pastor.

Cum non sit major toto sapientia mundo
Cognitione DEI, Cognitione Sui;
Cum redeat tempus Christi memorabile fato,
Quod nos peccatis indoluissè jubet:
Hæc etiam Friderice Tibi Sapientia Curæ,
Hæc, quæ proponis, tempora sacra volunt.
Præside sub Magno rursus sacra pulpita scandis,
Et vitæ fontis flere piacla doces:
Dispice, ais, miseram Mortalis dispice vitam,
Quam foedat scelerum perniciofa luc.
Tristia disce brevis cognoscere tempora vitæ,
Et tanti causam ritè dolere mali.

Quælibet

Qualibet in toto te corpore fibra docebit
 Quàm tua sit vetitâ perdita massa dape.
 Sis gnarus, quæso, miseræ diffidere vitæ,
 Quæ, quorsum spectes, undique plena malis.
 Non licet admissum Mortalem abscondere crimen,
 Omne malum *Domini* lumina iusta vident.
 Non licet ulli hominum iustum vitare Tribunal,
 Nam quo se vertunt lumina, semper adest.
 Non licet occultè velum prætere facis,
 Sed temerata sibi mens sine teste timet.
 rumpe moras igitur, ne te demittat ad orcum
 Iusta, reos pœnæ quæ facit, ira reos.
 Sit Tibi Salvando primum mens conscia culpæ;
 Iræ sit sensus, tristis in ossè dolor,
 Os patulum culpas sincero corde fatèri;
 Ex odio culpæ vivere perge *DEO*.
 Sic extende manum, promissam prende Salutem,
 Quam spectat Christi vulnere nixa fides.
 Hæc, inquam, tractas *Metanæ* sacra *Gerolde*,
 Et *Studij* præbes publica signa *Tui*.
 Iam dudum primas didicisti sedulus artes,
 Quæ facilem sternunt ad graviora viam.
 Hactenus ingenii solers intendere vires,
 Doctus es è Cathedrâ verba diserta loqui.
 Sacrarum pergis tractare negotia rerum,
 Sacri perlustras mystica sacra libri.
 Tu vehemente cales melioris ab Indolis æstu,
 Artis Tu sanctæ maximo amore cales.
 Una Tibi studiis animum coluisse voluptas.
 Cœptis applaudo, Suavis *Amice*, Tuis:
 Imploro *Numen* Sancto cœleste precatu,
 Ut serat in mentem non nisi sancta tuam.

M. J. Th. Heinrich Argent.
 p. t. Pastor in Mundolsheim und
 Nieder-Hausbergen.

F I N I S.

00564732